

## Marku Deuxu Rybe Wihikỹ Tỹmyra, Marku Tyyritidỹỹdu

<sup>1</sup> Kaki heka Rybe Wihikỹ juhu kaki roire. Ka Rybe Wihikỹ Jesuisi Kristumy heka rarybereri. [Tii heka Deuxu Riðre rare.] <sup>2</sup> Myheka Isaia tyyriti-ki kia rybe rỹire:

Deuxu rarybere: —Boholake, waõwàdàdu ariteònykre akomy. Tii ary riwinykre.

<sup>3</sup> Tii ryrmyhỹ bederahy-ki: —Kai biwinykre ry-wihikỹ Wanyrỹ dee. Òbiti tamy biwinyke.

<sup>4</sup> Joaõ Sebedỹỹdu bederahy-txi taile ihỹmyhỹ rybe tyyriti ritỹnynymhỹ. Tii sebenaõmy riòbitinymhỹ. Kia riwinykemy ixi-txi tõhõti reakemy taðraru-txi kia Deuxu ritakemy. <sup>5</sup> Ibutumy Judeia bede ludu mahãdu Jerusalẽ hãwã mahãdu-wana rare bederahy-ò. Taðrarumy relyymy rahudi tahe, Joaõ risebenyre bero Jordaõ-ò.

<sup>6</sup> Joaõ rexityynyre kamelo rade tyy-di, tule iròdutyy wereysana iwetya-ki roimyhỹre. Irỹsỹna raremyhỹ, seihikỹle bidi-wana. <sup>7</sup> Joaõ rybe tyyriti ritỹnynydyỹmy rarybemyhỹ: —Jiarỹ aõ aõkõ rare, waruru-di aõkõ. Inyõ wahewomy kanakre tahe iruru waruru ratyredỹỹnadu rare. Waratyre awityhyke. Jiarỹ riwaixỹrunymy watxireri iwataana ese-ki.

<sup>8</sup> Jiarỹ bedi arãsebenyre. Tii heka Deuxu Tyytybytyhy-di arãsebenykre.

<sup>9</sup> Kiatxu Jesuisi nade Nazare Kalileia bede ludu-ribi. Joaõ tii risebenyre Jordaõ bero-ò. <sup>10</sup> Tii

bera-ribi dotuodeu biuwetyky rarayre. Deuxu Tyytybytyhy heka bòtòe wese tamy dobehede. <sup>11</sup> Deuxu rybe-ò roholare biu-ribi: —Kai heka Wariòre waluu tate. Adi wadeysawihikỹreri.

<sup>12</sup> Aõwesele Deuxu Tyytybytyhy heka Jesuisi riteònyre bederahy-ò. <sup>13</sup> Tii bederahy-ki 40 txumy bede idi rỹire. Satanasi aõhòkỹmy risỹnymy Jesuisi raremyhỹ. Iròdu deborehekỹ tai rỹiramyhỹ. Ÿjureny iyrubudỹỹmy rehemynyre.

<sup>14</sup> Joaõ rare ròtenawo-ò, idita Jesuisi Rybe Wihikỹ ritỹnynykremy dehemynyde Kalileia-ò. Jesuisi heka Rybe Wihikỹ ritỹnyndỹỹre: —Deuxu Iòlòna bede-ò wahe. <sup>15</sup> Jesuisi rarybera: —Bedeỹỹnanaha bede reara. Deuxu Iòlòna bedehede iòhòra. Kaiboho ixi-txi òhòtirenny reake aòrarurenny-txi bityhynybenyke Deuxu Rybe Wihikỹ.

<sup>16</sup> Jesuisi aho ijàti-ki rariamy ihỹmyhỹ. Tii robira tuurenny taseriòre-wana ihỹmyhỹ-ò, Simaõ Pedro, Andre-wana. Tiiboho rehumy ihỹmyhỹrenny rià-di. Tiiboho heka waxidu roire. <sup>17</sup> Jesuisi rarybera tamyrenny: —Kaiboho bodoibedenyke wahemy. Tai tahe araerynanyrennykre inny rirykemy utura temyta wese. <sup>18</sup> Tahe aõwesele rià ririrenny. Roire Jesuisi-wana. <sup>19</sup> Iko roire Joaõ, Txiau, taseriòre-wana. Tiiboho heka Zebedeu riòre roire. Tiiboho hãworo-ki ratximyhỹrenny rià riywinymyhỹrenny. <sup>20</sup> Jesuisi tamyrenny rarybera: —Wahemy bòdòike. Tahe aõwesele tybyrenny ririrenny teòdu-wana. Tahe tiiboho roire Jesuisi-wana ierydỹỹnamy roirekemy.

<sup>21</sup> Tiiboho rirònyrenny Kafanaõ hãwã-ò. Judeu

mahādu aōmysyḍḍyḥna txu aōkō. Jesuisi ralore judeu mahādu dohodḍyḥna heto-ò eryḍḍyḥmy.  
<sup>22</sup> Kowa mahādu urile bedede riòtiinyre irybe-ki. Tii heka irurutyhy-di rierynanyre, ieryḍḍyḥdu mahādu wese aōkō rohodḍyḥnanymyhḥre. <sup>23</sup> Kia bedeu heka hābu tyytybybina-di ratximyhḥre dohodḍyḥna heto-ki. Tyytybybina hābuwo-ribi rarybere: <sup>24</sup> —Aōhebo wadi botḥyḥnykre Jesuisi Nazare ludu. Biwahubenykre aōbo? Jiarḥ araeryre mobo kai tatehe, kai heka hābuōtyhy inatyhy Deuxu-ribi kai tate. <sup>25</sup> Jesuisi tarurumy rarybere: —Kai rybeōmyke. Iribi bōhōnyke tyytybybina. <sup>26</sup> Tyytybybina hābu riatyre riworḥsḥworḥsḥnylemy. Tyytybybina raryre rybe iteremy, idi rōhōnyre. <sup>27</sup> Ibutumy iny ribedeòtiinyre. Ritḥyḥraxinyre ijō: —Aōwexe ratxireri, aōeryḍḍyḥnatḥmyrabo ratxireri. Tii riteōnyre tyytybybina. Tyytybybina Jesuisi rityhynyre. <sup>28</sup> Ityhynina Kalileia bedede bedemy reare.

<sup>29</sup> Tahe dohodḍyḥna heto-ribi rōhōnyrenyrene. Jesuisi, Txiau, Joaō-wana roirenyre Simaō, Andreboho heto-ò. <sup>30</sup> Simaō riòre lahi roimyhḥ rubunamy. Tahe aōwesele tuu relyyre Jesusiko. <sup>31</sup> Jesuisi rimyre tebò-ki, tahe, aōwesele irubuna ixāwira. Idi tahe hāwyw tamyreny bedede redere.

<sup>32</sup> Txu ralōmy rahudi, ibutumy tamy didydenyde inybina bina. Tule iny tyytybybina tamy didydenyde. <sup>33</sup> Ibutumy iny hāwā ludu iheto ijō wirotyre. <sup>34</sup> Tii ibutumy binana òta òta riywinyre. Sōwemy tyytybybina riòlòḍḍyḥnyre. Tyytybybina Jesuisi rierymyhḥre. Tai tahe Jesuisi riijōnyre tyytybybina rarybekeò.

35 Rudile Jesuisi rare bederahy-txi rexitòenykremy. 36 Simaõ, ijõ mahãdu-wana Jesuisi ijesityhymy roire. 37 Tiiboho Jesuisi raharenyre. Tamy rarybere: —Ibutumy iny arãijereri. 38 Jesuisi tamyreny rarybere: —Rokoikehe rekexinoranyrenyke hãwã wixira-ò. Jiarỹ tamyreny rybe tyyriti aritỹnynykremy. Iurenana tahe jiarỹ anade. 39 Jesuisi rare ibutumy Kalileia bede-ò. Tyytybybina iny-ribi riteònyre. Tule dohodỹyna heto-ki tii rybe tyyriti ritỹnynyre.

40 Hãbu tyybina mahãduõ Jesuisi-ò nade. Tii tatiowotimy resere Jesusiko-ò. Tahe Jesuisi-ò hãbu rarybere: —Adee awikeki tahe, biwateytenyke. 41 Jesuisi juhu urile riwotòenyre. Tii hãbu ritorunyre. Tahe rarybere: —Wadee awire, atyy awimy relekre. 42 Tahe aõwesele ittyybina reytera. 43 Jesuisi hãbu riteònyre. Rarybere: —Kai tahe inyõdee rybeõmykre. 44 Kai bexiteòsinykre Deuxu aõmysỹdỹdu-ò. Iwese Moisesi ròerynadỹnyre wese, kai bexiteòsinykre. Kia heka inydee deòsinamy riteòsinyre. Kia iny rieryke timybo teytemy atximahãtemy. 45 Tahe hãbu rare ibutumy inyko relyyra. Kia heka Jesuisi tahe uritere hãwãhãkỹõ-ò ralòõhyyre. Tahe bederahykile rarire. Ibutumy iny tamy rare ibutumy bede bede-ribi.

## 2

1 Tiutxuõmybo Jesuisi dòòsede Kafanaõ-ò. Idi tahe rybe reare rehemynymy ratximyhỹ heto-ki. 2 Tahe iny, aõriòre aõkõ, tamy wirotyre heto ijò-ò. Tahe Jesuisi relyymyhỹ Deuxu rybemy. 3 Hãbu inaubiòwa heka hãbubina-di tamy

detyydenyde. Kia hãbu rawòronyire taumy-ki. <sup>4</sup> Jesuisi-ò rehemynyõhykylere iny sõwerekì. Tahe raòwònyrenyire idi heto ratyytyre-ò. Hetotyre riraynyrenyire tahe reru-di diberesedỹnydenyde byretyre-ki Jesuisiko-ò. <sup>5</sup> Jesuisi rieryre hãbu rityhynyrenyire, tai rarybere hãbubina-ò: — Waexi aòraru-ribi araixitarasadỹnyire. <sup>6</sup> Bede ywina erydỹ mahãdu rorukurenryeri, ixideele rarybemy rỹimyhỹre: <sup>7</sup>—Aõherekibo hãbu kiawese rarybereri. Tii iòwe òwelemy rarybereri. Deuxu dee aõbina binalemy rarybereri. Mobo tahe òraru-ribi iny ritake. Deuxule òraru-ribi iny ritake. <sup>8</sup> Jesuisile roholaõlere ihãrele rieryre aõmybo raryberenyire. Tai tahe Jesuisi tamyreny rarybere: —Aõherekibo kiawese tarybetenyteri. <sup>9</sup> Tibohe isiraõtyhyre, tuu ararybeke: —Aòraru-ribi anaixitarasadỹnyire ada myike, abyre bimyeke, mariake. <sup>10</sup> Kaiboho bierykemy Deuxu Riòre Hãbutyhyhykỹ irurudire iny òraru-ribi iny ritakemy. <sup>11</sup> Tahe hãbubina-ò rarybere: — Boholake, myike, abyre bimyeke tahe makre aheto-ò. <sup>12</sup> Tahe hãbu rỹire, tabyre rimymy tahe rare ibutumy inyru-ò. Ibutumy bede riòtiinyre tahe reàlàre Deuxumy. Ibutumy rarybere: —Tiu heka aõmy kawese rabiõhyymyhỹre.

<sup>13</sup> Jesuisi rare ahohokỹ ijà-ò. Ibutumy tamy doide. Tii iny ribedeerynyire. <sup>14</sup> Levi, Afeu riòre, ronymyhỹ nierumynydu hetowo-ki. Jesuisi ibire-di rareò, tii robira. Jesuisi heka Levi-ò rarybere: —Waijoimy mynake. Tahe rỹimy reare Jesuisi ijoi-ò ralore.

<sup>15</sup> Jesuisi taerydỹna-wana rorukure Levi

hetowo-ki. Tule nierumynydu mahãduõ rononymhÿre òrarudu-wana. Ibutumy riroximyhÿrenyre. Sõwemy heka kia iny mahãdu Jesuisi riheludunyre. <sup>16</sup> Bede ywina erydÿÿ mahãdu, lahi rybe-di erydÿÿna mahãdu tuu robirenyra. Idi raryberenyre Jesuisi erydÿÿna mahãdu-ò —Aõherekibo tii riroxireri òrarudu-wana, nierumynydu-wana. <sup>17</sup> Jesuisi roholareu, tamyreny rarybere: —Iny ibinaõkeki tahe luaaidu tamy kanaõtyhy. Tahe iny ibinakeki, tamy kanake bina-ò. Òbiti mahãdu itxemy aõkõ anade. Tahe òrarudu mahãdu itxemy anade.

<sup>18</sup> Joaõ erydÿÿna mahãdu, lahi rybe-di erydÿÿdu mahãdu-wana byreõhyky txuu tutyhyle rÿimyhÿrenyre. Tahe roire Jesuisi dÿÿraxidÿÿmy. Inyõ Jesuisi ritÿÿraxinyre: —Aõherekibo Joaõ erydÿÿna mahãdu byreõmy rÿiõmyhÿre. <sup>19</sup> Jesuisi rirawyõnyre: —Heriduõ, itxeredu-wana ratxireriu, byreõmy rÿiõtyhy tutyhylemy. <sup>20</sup> Tiutxulemybo tahe heridu iribi kanatakre, tai tahe byreõmy kÿnyikre tutyhylemy. <sup>21</sup> Moheka tyytÿmyra dõbõna ritidikre tyytyby-ò. Idi inatyhymy dõbõna rayjakre tahe tyytyby sõwemy raykake. <sup>22</sup> Moheka òteti bederatyrube tÿmyra rihynymyhÿre iròdutyy walabuutybywo-ò. Idi tahe raberyrònymyhÿreu, urile iròdutyy walabuu raykake tahe irube rejujuke. Tule iròdutyy walabuu ribinadÿÿnymyhÿre. Irubetÿmyra awire heka iròdutyy walabuu tÿmyrarokile.

<sup>23</sup> Judeu elehydÿÿnareny txu Jesuisiboho ririranymyhÿrenyre maixõmo wesena oworomy, tai ierydÿÿna riòròmymhÿrenyre riroxirenykemy.

24 Tahe lahi rybe-di erydỹỹdu mahãdu rarybere Jesuisi-ò: —Aõherekibo aerydỹỹna mahãdu riwinyreri aõwidỹỹna aõkõ karare sabado txu. 25 Tahe Jesuisi tamy rarybere: —Kaiboho aõbo teriranyõletenyta tyyriti-di. Iwese Daviboho-wana aõhebo rotỹỹnyreri aõmy rekoarenymahãu, rama rahumyhỹrenyu. 26 Tii ralore hetotyhy-ò. Tai tahe orotxu sira ybina riyre, tule tamahãdu-ò riwahinyre. Kia tahe Deuxu deòdule rirỹsỹmyhỹre. Kia Davi aõhebo rotỹỹnyre Abiata heka Deuxu deòdu wedurau. 27 Jesuisi tamyreny rarybere: —Sabado txu heka rawidỹỹre inydee, iny tahe rawidỹỹõre sabado txu dee. 28 Deuxu Riòre Hãbutyhyhykỹ tahe sabado txu wedu rare.

### 3

1 Ixityre Jesuisi ralore dohodỹỹna hetowo-ò. Hãbu debò binahakỹõ tai ratximyhyỹ. 2 Lahi rybe-di erydỹỹdu mahãdu Jesuisi retehemyhỹrenyu. Jesuisi sabado txuule riteytenykeki, tiiboho rarybekemy aõbinabinakibo raharenkemy Jesuisi. 3 Jesuisi heka hãubina-ò rarybere: —Manake. 4 Tahe Jesuisi ijõ mahãdu-ò rarybere: —Aõwihikỹwidỹỹ awire ada aõbinalemy widỹỹ awire. Tibohe awire, itarasa-ki aõbo ada rubu-ki aõbo. Hãbu mahãdu urile riyryre. 5 Jesuisi tamyreny retehere raõbinamy. Tii heka iaõna aõna riwotòenyrenymyhyỹ. Jesuisi hãbu debò bina-ò rarybera: —Ebò biterenyke. Tai tebò riterenyreu, aõwesele awimy relere. 6 Lahi rybe-di erydỹỹdu mahãdu rara Iòlò Herodi mahãdu-ò. Tiiboho raryberenyre timybo tahe Jesuisi rirubunyrenyke. 7 Jesuisi rexitare

taerydỹña mahãdu wana aho-ò. Tahe sówemy iny Judeia mahãdu, Kalileia mahãdu riheludunyre. <sup>8</sup> Ibutumy aõna aõna roholare Jesuisi riwinyreò. Tahe sówemy tamy nade: Jerusalẽ hãwã mahãdu, Idumeia hãwã mahãdu. Iny Jordaõ bero ijà-ribi tule nade. Tule iny Tiro hãwã, Sidõ beà hãwã-ribi iòhòmy tamy nade. <sup>9</sup> Tahe Jesuisi taery mahãdu-ò rarybere: —Walawò bidiwykre. Iny sówemy dori rehemynyeri. Kidiwawotõmonykre òsana. <sup>10</sup> Ibutumy bina mahãdu ibymy tebò reareri ixideytedỹmy. Urile iny sówemy riywinyre dori. <sup>11</sup> Tyytybybina Jesuisi reteherenyreu, urile iko-txi resere ryryreri: —Kai Deuxu Riòre tate. <sup>12</sup> Tai tahe Jesuisi rarybere tyytybybina-ò, uritere iteòsidỹõmykemy.

<sup>13</sup> Tii raòwònyre bederatòòmy. Tahe taerydỹña-ò ryryre tibo tamy reòbykemy. Tahe tamy nade. <sup>14</sup> Tahe ierydỹña waòinatxi reuròmý rarunyre tii-wana rarekemy, rybe ritỹnynydyỹkemy. <sup>15</sup> Tule iruru-di rarekemy inybina riteytenykemy. Tule irurudikemy tyytybybina riteònykemy. <sup>16</sup> Kie ierydỹñanirenyre: Simaõ, (tii tahe Jesuisi ijõni riwahinyre, Pedromy) <sup>17</sup> Txiau ijõ, tii Zebedeu riòre rare. Kia seriòre Jesuisi rininirenyre, Boanejimy, inireny. Kia heka irybereny rare, Biumytxy riòrereny. <sup>18</sup> Ijõ heka Andre, Filipi, Bartolomeu, Mateu, Tome, Tadeu, Txiau. (Kia Txiau heka Afeu riòre rare.) Ijõ Simaõ iwitxira, (tii brebuòmý rybe-ki, tasubedeluudu wahe.) <sup>19</sup> Judasi Isariò ijõre, kia heka Jesuisi riwahinyre iòludu-ò.

<sup>20</sup> Tahe Jesuisi nalode taheto-ò. Ixityre iny sówemy tamy nade. Tai tahe Jesuisi



taerydỹna-wana riroxiõhyyre. <sup>21</sup> Idi tahe Jesuisi leinareneny itxỹtesana roholarenyreu, riõryrenyrene. Tiiboho raryberenyre: —Jesuisi itxỹte iõhõlere. <sup>22</sup> Bede ywina erydỹ mahãdu doide Jerusalẽ-ribi rarybemyhỹrenyrene: —Belisibu idi ratximyhỹre. Tyytyby wedu ruru-di tyytybybina iny-ribi riteõnyreri. <sup>23</sup> Jesuisi inyko iyyymy relyyre: —Timy taheka Satanasi rexiteõnykre Satanasi. <sup>24</sup> Iõlõna wiribi rexihitxinykeki tahe, rexihukre ibutumy wiludu. <sup>25</sup> Tahe sỹro luduõ wiribi rahitxikeki, rỹiõtyhy. <sup>26</sup> Satanasi rỹikeki reburemy, tii ixiõbitile rexirubunyke. <sup>27</sup> Inyõ heka hãbu rurutere hetowo-txi ralõõtyhy. Tai rawasinykeki, urile iny ritaataake. Urile hãbu rataataakeki, irõõbymy iny rawasinyke. <sup>28</sup> Inatyhy jiarỹ adee ararybereri, ibutumy òraru heka kanaixãwidinykre hãbu dee aõtxile aõbina binamy rarybemyhỹre. <sup>29</sup> Kia inyõ aõtxile aõbina binamy Deuxu Tyytybytyhymy rarybekeki, tiu heka iòraru rataõtyhy. Kia òraru riwinyre tiiehyymy rarekemy. <sup>30</sup> Jesuisimy kiamy narybedenyde: —Tii heka tyytybybina dire.

<sup>31</sup> Tadi tahelỹna-wana nade. Tahe ahanakile ritamanyre. Tamy riteõnyrenyrene iòrysomy. <sup>32</sup> Iny sõwemy iwerora-di ronyre. Tahe Jesuisise-ò rarybere: —Adi aseriõre-wana ahanakile nyide, araijeneri. <sup>33</sup> Jesuisi rarybere: —Mowe nadi rare, waseriõreboho rare. <sup>34</sup> Juhu urile idi retehereri iwerora-ki. Tahe rarybere: —Betehekre, kai-boho ibutumy kaki nadiwesere, waseriõre wese toite. <sup>35</sup> Inyõ aõna aõna riwinymyhỹkeki, Deuxu dee awira. Kia heka nadi, waseriõre roire.

## 4

<sup>1</sup> Jesuisi ròðsera ahobero ijà-ò iny dohodỹỹmy. Sõwemy iny wirotyre. Tai Jesuisi ronyre hãworo-ò tahe rexitaranyre ahoro-ò. Aho ijà-ò iny wirotyre ijohonamy. <sup>2</sup> Tii aõna aõna sõwemy roerydỹỹnanyre ijyytyhydile. Kaa ijyymy tii relyyre: <sup>3</sup> —Boholake, alòbòròna-di dehudu rara alòbòrònamy. <sup>4</sup> Alòbòròna-di rehumyhyũ, ijõ ryro-txi resere. Tahe nawiixõmo rirore. <sup>5</sup> Ijõ rejujure manarutàsú-txi. Tahe aõwesele raumynyre iraruxiõlemy su dori ibutere. <sup>6</sup> Irauxiõreki, bede tòtee alòbòròna rimoenyre idi rurura. <sup>7</sup> Ijõ oworuty resere edehu-txi idi ruhunyre edewanale. Tai tahe ede-ò riòdesenyre tai raratynyõlere. <sup>8</sup> Ijõ resere su wixira wihikỹ-txi. Kia tahe raumynyre. Tahe sohoji oworutyõ 30my iraty raratynyre. Ijõ oworuty 60my raratynyre. Ijõ tahe 100my raratynyre. <sup>9</sup> Tii rarybera: —Kaiboho aõbo õhõtidiirenyre, inatyhymy warybe-ò boholake. Adee awikeki, bierybenyke.

<sup>10</sup> Iny robỹtỹreu, ijõ rarilere ierydỹỹna mahãdu-wana. Tiiboho rỹỹraxire Jesuisi-ò: —Aõhekemybo telyyta ijyymy. <sup>11</sup> Jesuisi tamyreny rarybera: —Deuxu Iòlòna rybemy Deuxu araerynanykre. Kia heka tuu teeryõmahãte. Kowaboho-ò jiarỹ urile ijyymy relyyra. <sup>12</sup> Tai tahe kia wesele relyyra.

Iny retehemyhỹkemy tahe robiõhyymyhỹre. Roholamyhỹre ta, rieryõhyymyhỹre. Tai tahe ralòkemy aõkõ, taòraru riixãwididỹỹnakemy aõkõ.

<sup>13</sup> Tii tami rarybere: —Kaiboho aõbo teeryõhyyletyteri ijyy. Ihãre tahe timykibo

bierybenyke ijyy ibutumy. <sup>14</sup> Aloborodu rehumyhỹ alòbòròna-di. Kia oworuty heka rybe wese rare. <sup>15</sup> Oworuty ryijàti ludu heka iwese urijohonadu wese heka rare. Rybe-ò roholarenyreu, Satanasi nade rybe iwo-ribi ritakremy. <sup>16</sup> Manarutàsü ludu iwese iny reysamy roholareri. <sup>17</sup> Iny urihimyòle rarorehenymyhỹre iraruxi sòweõreki. Idihe rasirara irybe. Tule iny ralahatxinamyreki, ihyye tahe riixãwidinyra. <sup>18</sup> Ede rawo ludu iwese iny witxira roholareri. <sup>19</sup> Tiiboho taaõmydỹỹnadile rõhõtinyinmyhỹre. Sõwemy nieru-di ratxikemy rexinohõtinyinmyhỹre ta nieru riitxenanymyhỹre. Ijõ aõna aõnadile rexinohõtinyinmyhỹre. Kia aõna aõna rybe rirarutxinymyhỹre. Tai tahe rybe raratynyõmyhỹre. <sup>20</sup> Suwihikỹ ludu iwese iny witxira roholareri. Kia inatyhymy rỹireri heka raratynyre alòbòròna raratynyre wese. Ijõ raratynyre 30my, ijõ tahe 60my raratynyre. Ijõ tahe 100my raratynyre.

<sup>21</sup> Tii rarybera tamyreny-ò: —Uritere loosòna ideõmyke butxi worawo-txi ada herina rawora-woõ-txi aõbo. Loosòna bidekre bedewiõ-ò. <sup>22</sup> Inyõ iwòteõmy aõna aõna tiiehyymy. Tiutxulemybo ratỹnykemy ihỹre. Iwòteõmy atximahãbenyke aõu bodobikemy atximahãtenyete. <sup>23</sup> Kaiboho aõbo õhõtidiirenyre, inatyhymy boholake. <sup>24</sup> Tahe Jesuisi tamyreny rarybera: —Kaiboho inatyhymy boholabeny tamy taholahãtenyeteò. Urihixina iwese teõteri wesele, kai biwykre. Ihãre tahe biwykre ijõ teõta-ribi ritamy. <sup>25</sup> Hãbuõ ijõõkeki tamyle rawahidỹỹke, tahe hãbuõ ijõõkeki iribi ratatyhyke.

<sup>26</sup> Jesuisi relyyra kia ijyymy: —Deuxu Iòlòna kia ijyy wese rare. Hābu rehumyhỹre alòbòròna-di suò. <sup>27</sup> Hābu rummy rōrōmyhỹre txulemy rexixamyhỹre. Tii rieryōlemyhỹre timybo alòbòròna ratybienymyhỹre. <sup>28</sup> Suu ixi dee sohojile raratomyra. Juhuu iòle ramyhỹre. Idi tahe raratynymyhỹre, ihewonau, tahe, iraty rasònymyhỹre. <sup>29</sup> Bederaty rasònymyhỹreu, iyresydu riteònymyhỹre. Mayrabu-di riòròkemy bederatysò butudỹ̃na dori rexihumyhỹre.

<sup>30</sup> Tii rarybera, Deuxu Iòlòna wexe aõwesere. Aõ-ò wexe rikioirenykre. Tiwexe ijyy kawesere.

<sup>31</sup> Kia heka mostardaty wesere. Tii heka iyлатыhymy ratximyhỹre kabede-ki. <sup>32</sup> Tahe tii raumynymyhỹre wana, ireitòbòròdỹ̃ ratyre rarurururunymyhỹre. Tahe nawii tamyle rasỹnymyhỹre. Iubòròrò rawolemy taheto riwinyre.

<sup>33</sup> Tahe Jesuisi Deuxu rybemy rierynanymyhỹre. Kia ijyy wese sōwemy ijyy rierynanymyhỹre. Kialemy iny-ò Jesuisi relyymyhỹ ibutumy tamy reny ritynynynyhỹreki. <sup>34</sup> Kia-ò riòbitinyōlere ijyyō. Tahe iny-ribi irehemy taerydỹ̃na-ò riòbitinyre.

<sup>35</sup> Iu txu txiorolemy Jesuisi rarybere taerydỹ̃na-ò: —Rikiòhòrerenyke kowa weribi ijà-ò.

<sup>36</sup> Sōwemy iny rarire aho ijà-ki. Tahe taerydỹ̃na tamy ralore. Roire hāwò-di. Tahe ijō hāwò idi ratximyhỹre. <sup>37</sup> Tahe bede binahakỹ rexide-lenyre yhymy. Tahe òbò hāwò rihātenymyhỹ tai ritỹmynykemy ritelenyre. <sup>38</sup> Tai tahe Jesuisi rōrōmy roimyhỹ tòro-ki irati tarahynatyre-ki. Tai tahe riixixanyre. Ijō rarybere: —Waerydỹ̃du, adeehe

awimy aõbo iny ituerenykre. <sup>39</sup> Rexixamy Jesuisi. Tii yhy riixãwididỹnyre. Tii ahohokỹ-ò rarybere: —Biyryke! Tai bede ruhwihikỹre. <sup>40</sup> Tamyreny rarybere: —Aõherekibo kaiboho taberutenyteri? Deuxu aõbo tetyhynyõmahãtenyete? <sup>41</sup> Tai tahe tiiboho bede riòtiinyrenyra. Tahe widee raryberenyre: —Mowexe tuu yhy ahohokỹ-wana irybe riywinyke.

## 5

<sup>1</sup> Ritehemynyrenyre ijõ berohokỹ weribi ijàna-ò. Kowa heka ibutumy hãwãhãkỹ Kadarena inirenyre. <sup>2</sup> Jesuisi hãworo-ribi resereu, hãbu tyytybybina-di robire ròhònyreri wabede-ribi. <sup>3</sup> Kia heka tiemy rasỹnomy raremyhỹ wabede-ki. Katahe wiji moheka womati reroti-di rataataaõtyhy. <sup>4</sup> Aõdorihe òhòõre tebò iwa rataataare womati reroti-di. Tiiemy heka rimoenymyhỹ. Teòruty ludu tawararu ludu tule ritòtnymyhỹre iyresymy. Moheka iruruõre iny erydỹmy. <sup>5</sup> Txuu ruu-wana heka tii rasỹnyre wabedewo-ki. Tii rariamyhỹre bederatòòmy. Tule rirajuamy tai rexihãtenyre mana-di. <sup>6</sup> Tai tahe Jesuisimy robireu, tii rajjaranyre Jesuisi-ò. Resere tatiowotimy Jesuisiko-ò. <sup>7-8</sup> Jesuisi tyytybybina-ò rarybere: —Iribi bòhònyke. Tahe tyytybybina rarybera: —Aõwe wadi tate. Kai, Jesuisi, ibutumy inyõ dee inyrateyrate. Kai Deuxu Riòre tate. Lànhàmy lànhà, uritere aõbina binahakỹmy wahòròdỹõmykre. <sup>9</sup> Jesuisi ritỹỹraxinyre: —Mobohe anire. Tyytybybina rirawyònyre: —Wanireny sòwetyhyre wasõwerenyreki. <sup>10</sup> Urile karibi wateòdỹỹrenyõmykre. <sup>11</sup> Tahe kowa-ki

ix̄ni juramy riroximy r̄ĩmyh̄y bederatòò-ki.  
<sup>12</sup> Ibutumy tyytybybina rexitòenyrenyre: —  
 Biwateònybenyke ix̄ni jurawomy aralòrenykemy.  
<sup>13</sup> Tahe Jesuisi riteònyre. Tyytybybina aõwesele  
 ròhònyre tahe ix̄niwomy ralore. Ix̄ni jura tahe  
 raòrunyre rejuxunyre ijòtira-ribi. Berawo-txi  
 tahe rabòròròre ahohok̄y-ki. Inatxi mil ix̄ni  
 rabòròròre. <sup>14</sup> Ix̄ni-di itxeredu reare ijyymy  
 ibutumy h̄awā h̄awāmy relyyrenyre. Tahe iny  
 dirahude tamy itxeremy. <sup>15</sup> Tiiboho Jesuisi-ò  
 doideu, tuu robirenyra h̄abu tyytybybina-di  
 raremyh̄y. Tii rexitynymy ronymyh̄y. Tii  
 heka òbitimy r̄õhõtynymyh̄y. Tai iny mahādu  
 rabedeòtiid̄ȳnyre. <sup>16</sup> Tiiboho tuu robirenyre,  
 ijõ-ò relyyrenyre ix̄ni ijyymy, timybo aõhebo  
 rot̄ȳnyremy h̄abu tyytybybina-di ratximyh̄y.  
 Tule relyyrenyre timybo rot̄ȳnyre ix̄ni  
 jura. <sup>17</sup> Iny rexitòenyre Jesuisi-ò rexitakremy  
 isureny-ribi. <sup>18</sup> Jesuisi h̄aworo-ò ralore. Tahe  
 h̄abu tyytybybina-di ratximyh̄y, rexitòenyre  
 Jesuisi-wana rakemy. <sup>19</sup> Tahe Jesuisi idy derare.  
 Tamy rarybera: —Mahe as̄y-ò, aijoi-ò belyyke  
 aõna aõna Deuxu adee riwinyremy, iwese tii  
 araruxetòenymyh̄y wese. <sup>20</sup> Tahe h̄abu rare  
 Debòwiò h̄awāreny-ò. Ibutumy Jesuisi aõna  
 aõnamy ixidee riwinyremy relyyre. Ibutumy  
 iny ribedeòtiid̄ȳnymyh̄y.

<sup>21</sup> Ixityre Jesuisi rare ahohok̄y weribi ijà-ò. Ix-  
 idee iny s̄owemy ributunyre. Tii heka ih̄ymyh̄y aho-  
 hok̄y ijà-ki. <sup>22</sup> Tahe dehemynde tamy dohod̄ȳna  
 heto weduõ. Ijairu inire. Tii Jesuisi robireu, resere  
 tatiowotimy iko-txi. <sup>23</sup> Ijairu rarybere Jesuisi-ò: —

Wariòre irubu iòhòtyhylemy roireri. Kai manakre tamy ebò bitidikremy. Tai awimy relekre, ru-ruòtyhy. <sup>24</sup> Tahe Jesuisi tii-wana rare. Iny sòwemy tule rare iòhòkile tamy rỹire.

<sup>25</sup> Kia heka hāwyyō binamy ramyhỹre. Ihālubu rejuxunymy raremyhỹ. Beòra waòinatxi reuròmymy rejuxunymyhỹre, rihuòhyy raremyhỹ. <sup>26</sup> Tii aòhòkỹmy rotỹỹnymyhỹre sòwemy òhotibedu mahādu-di. Tahe awimy rotỹỹòlemyhỹre. Urile tanieru ibutumy rahure òhotibedu mahādu-ki. Awimy releòlemy, ire bedè-ò resere. <sup>27</sup> Tahe roholare Jesuisi nina-ò tahe iòhò-ki nade inyy-ki. Idi ihewo-ribi rimyra itynora-ki. <sup>28</sup> Hāwyy ixidee rarybemyhỹre: —Krile itykynora-ki karimykiki, karekyteke. <sup>29</sup> Tahe aòwesele ihālubu ijera ixāwire. Ixidee awimy ròhòtinyre. <sup>30</sup> Jesuisi rieryre iruru iribi ròhònyremy, tai rarybere: —Mobo watynora rimyra. <sup>31</sup> Tahe ierydỹỹna raryberenyra aòherekibo tuu tarybeta ibutumy taheka iny abirelemy rỹireri. <sup>32</sup> Jesuisi rethemyhỹre urile mobo rarekemy. <sup>33</sup> Hāwyy rierymyhỹ aòhebo rotỹỹnyre. Tii ruberumy Jesusiko-ò resere relyykemy iko. <sup>34</sup> Jesuisi rarybera: —Lerỹ, atyhydỹỹna kỹnyhe aratara. Mahe, kai dori texiywinyta.

<sup>35</sup> Tii rarybemyhỹò, dohodỹỹna wedu deòdu rehemynyrenyri. Tiiboho raryberenyra: —Wawedu, Ijairu, ariòre rurumy roireri. Aòmybo tahe Erydỹỹdu-di atxiteri. <sup>36</sup> Jesuisi kia-ò roholara tahe rarybera dohodỹỹna wedu-ò: —Brebuòmymy, urile bityhynkre. <sup>37</sup> Jesuisi-wana roire, Pedro, ijō Txiau, ijō Joaō. Joaō heka Txiau seriòre rare.

Kaòle heka reòbyre tii-wana rakemy. <sup>38</sup> Dohodỹña wedu heto-ò dehemynydeu, ixiyjadỹ-ò roholara, robureriò, rirajuarerìò. <sup>39</sup> Jesuisi ralore tahe rarybera: —Aòherekibo tabutenyteri. Hiraririkỹ rurumy aòkò roireri. Tii urile ròròreri. <sup>40</sup> Juhu urile tai rutxuenyrenyra Jesuisi-ki. Tahe Jesuisi ibutumy iny riòlòdỹnyra hetowo-ribi. Tahe ise, tybyle, ixidee rimyrenyra ratxirenykemy. Tahe tamy rirònyrenyre tai hiraririkỹ roimyhỹò. <sup>41</sup> Jesuisi hiraririkỹ debò rimyre tahe rarybera: —Talita kumi. (Katahe iwitxira rybemy rarybera. Kiamyneri heka, mynyikemy.) <sup>42</sup> Aòwesele hiraririkỹ rỹimy reara. Tahe rariara aòmyreki iwyrwa waòinatxi reuròmy iwyrwamy. Tahe urile bede riòtiinyrenyre. <sup>43</sup> Jesuisi riteranyre moò rierydỹkemy aòkò. Jesuisi tule rarybere: —Rỹsỹna tamy biwahinykre.

## 6

<sup>1</sup> Jesuisi dexitade kowa bede-ribi. Tahe tauladu tybiena hãwã-ò dehemynyde. Taerydỹña mahãdu riheludunyre. <sup>2</sup> Sabado txumy rierynanyre dohodỹña heto-ki. Sòwemy iny roholamy rỹimyhỹ bede riòtiinymy. Tahe rarybere: —Tiribibo kia hãbu aòna aòna bede rieryre. Aòbedeeryhykỹbo ratximyhỹre. Timyta heka bedeòby riwinyre. <sup>3</sup> Kia aòbohe aòwidỹydule ratxireri, Marie riòrele. Tiiboho aòbohe Txiau, Jyje, Judasi, Simaò, seriòrebohòle ratxirenyreri. Terỹbohò aòbohe tule kakile ratxireri. Ibutumy iny heka Jesuisi derarenyre. Irybe rityhynyòre. <sup>4</sup> Jesuisi rarybere tamyreny: —Deuxu rybedỹdu heka tyhydỹña ritaòlekre tahãwãreny-ribi,



tajoi-ribi, tasỹ-ribi. <sup>5</sup> Tahe Jesuisi kowa-ki bededby riwinyõlere. Urile tebò ritidire inybina bina tyre, taile riteytenyre. <sup>6</sup> Jesuisi urile bede idireny riòtiinyre rityhynyõlemyhỹrenyrekiki. Tahe Jesuisi reurore hãwã hãwã-di erydỹỹmy.

<sup>7</sup> Tii ixidee ributunyre tawaðinatxi erydỹỹna mahãdu. Tii riteðnyre inatxi inatxi iubỹtỹnyre. Tamyreny taruru-ribi riwahinyre tyytybybina deòdỹỹki. <sup>8</sup> Jesuisi tuu rarybere: —Urile biwykre adebõna. Uritere orotxu aõkõ, nieruhyna aõkõ, nieru wereysanawo-ki aõkõ, iwydysyrenyõmykre. <sup>9</sup> Uritere waubehetyõmy noõmykre. Uritere inatximy wirawomy tyy-di ixityydỹỹõmykre. <sup>10</sup> Hãwã-txi malòkeki, tiiemy taile bonykre tiubedemybo iribihyyle bõhõnykre. <sup>11</sup> Titxi behemynybenykeki, uritere iny erarenymy reakeki, roholaõkeki, txiòrare, urileta awareny bitõtynykre bede erynamy. <sup>12</sup> Tahe tiiboho roire. Rybe ritỹnydỹỹmyhỹre iny ixidee rexirahĩrenykemy. <sup>13</sup> Tyytybybina irehemy iny-ribi ririradỹỹnykemy. Sõwemy inybina tyre òlỹre ritxiwire. Tai tahe riteytenyre.

<sup>14</sup> Kia heka iòlò Herodi roholara. Jesusini dori erynatyhymy raremyhỹ. Tahe ijõboho rarybemyhỹreny: —Joaõ Sebedỹỹdu rexixara rubu-ribi. Ijõ rarybemyhỹreny: —Èliale ratxireri. <sup>15</sup> Ijõ rarybera: —Deuxu rybedỹỹdu ratxireri. Deuxu rybedỹỹduõ wese heka ratxireri. <sup>16</sup> Herodi roholareu aõbo Jesuisi riwinyreu, rarybera: —Kia hãbu Joaõ ratxireri. Kia heka irati reorore heka rare. <sup>17</sup> Kia heka iòlò Herodi riteðnyre imynamy. Idi tahe ritisanyre ròtenawo-ò. Taseriòre hãwyy

òraru-ki kia riwinyre. Filipi iseriòreni rare. Iseriòre hãwyyini Herodia rare. Herodi, Herodia-wana roire iseriòre riòrese-wana. <sup>18</sup> Juhuule Joaõ rarybere Herodi-ò: —Kai aõkõre aseriòre hãwyy-di mabeõtyhy. <sup>19</sup> Herodia tamy iky reamyhỹ rirubunyky ratximyhỹ tahe aõkõhyylere. <sup>20</sup> Herodi tahe Joaõ rityhinyre. Tii rierymyhỹre Joaõ hãbu wihikỹõ ratximyhỹ. Tai riyrubunyre ròtenawo-ki. Herodi Joaõ roholareu, urile bedè riòtiinyre urile roholawihikỹre. <sup>21</sup> Kia txuu ibeòra reare Herodi lisina berenamy riwinyre. Tahe ibutumy hãwã dinodu, soldado wedu mahãdu, tule ibutumy hãbu ninihikỹ Kalileia mahãdu-ribi rihuòtere. <sup>22</sup> Ijadòma ralore resere, Herodia riòre. Herodi, iny huòtedu mahãdu-wana tamyreny awire. Iòlò ijadòma-ò rarybera: —Aõtxile aõma wadee bexitòenyke, adee ariwahinykre. <sup>23</sup> Inatyhymy adee ararybekre. Waaõna aõna iweeremy bexitòenykeki, adee ariwahinykre. <sup>24</sup> Ijadòma tadi ritỹraxyinyre aõmybo tahe tamy rexitòenykre. Ise rarybera: —Joaõ Sebedỹkỹdu rati kai bexitòenykre. <sup>25</sup> Tahe ijadòma ròsere iòlò-ò. Tahe ijadòma rarybera: —Joaõ Sebedỹkỹdu rati kai biwahinykre hyna tyre-ki. <sup>26</sup> Iòlò sõwemy rabadewore irybe-ki. Rexitxiõnyõlere iny dori sõwemy ibire-ki. <sup>27</sup> Iòlò soldado rariare Joaõ rati òrysymy. Tahe irati riorore ròtena-ki. <sup>28</sup> Tahe irati diwyde besetyre-ki. Ijadòma-ò riwahinyre, tahe ijadòma tadi-ò riwahinyre. <sup>29</sup> Joaõ erydỹna rieryreu tahe, nade iumy òrysymy. Tahe iumy riwyre wabede-ò.

<sup>30</sup> Jesuisi erydỹna mahãdu ròòserenyre Jesuisi-ò.

Tahe relyyrenyra ibutumy aõmydÿÿnana tule ibutumy rierynanymyhÿre. <sup>31</sup> Jesuisi tamy rarybere: —Inyboho sohojile rokoireny bederahy-txi ixielehydÿÿmy. Tii dori rarybera tamy heka byrena iõhòtyhyõlere tamy roxina raõhòõlere. Iny sõwemy tamy wii reutydynyneri. <sup>32</sup> Tahe tiiboho sohojile hãwò-di roire bederahy-txi inyõ-ò. <sup>33</sup> Iny sõwemy tuu robira ròhònyrerimy. Tahe iny ibutumy hãwã hãwã ludu rajaranyre tòròsòna-ò. Tiibohole juhu rehemynyre iko-ki. <sup>34</sup> Jesuisi rororeu, tahe inymy sõwemy robire, riraòreriò. Jesuisi tamy ratòenymyhyÿre. Tiiboho dori iwese budoeni idi itxereduõmy rÿireri wesemy. <sup>35</sup> Txuu raloreu, ierydÿÿna mahãdu Jesuisi-ò roire. Tiiboho rarybere: —Ka kÿnyhe bederahy roire txuuke rexihura. <sup>36</sup> Kai tahe iny biteònykre hãwã hãwã mahãdu-ò rÿsÿna ixideereny õbradÿÿmy. <sup>37</sup> Jesuisi tamyreny rarybera: —Kaiboho tamy rÿsÿna biwahinykre. Tahe raryberenyre: —Timybo tahe inyboho 200 prata womati nieru-di orotxu rikiõbranyrenykre. Timy wexe tamyreny rÿsÿna rikiwahinyrenykre. Jesuisi tamyreny rarybera: <sup>38</sup> —Tiwese orotxu bohe rÿire. Maa tamy itxeremy. Idi tahe rieryrenyreu, rarybera: —orotxu iruyre, utura inatxi. <sup>39</sup> Idi tahe Jesuisi iny rabòròhòkÿ asityre rorukukremy. <sup>40</sup> Idi tahe iny rabòròhòkÿ wii rirareare, ijõ sÿwètamy, ijõ 100my. <sup>41</sup> Jesuisi orotxu utura-wana rimyre tahe retehere biu-ò Deuxu-ò rexitòenyre. Idi tahe orotxu reòròòròre. Riwahinyre taerydÿÿna mahãdu-ò riwykremy iny-ò. Tule utura inatxi wirarea riwahinyre iny mahãdu dee. <sup>42</sup> Ibutumy iny riroxire. Rihydymy rÿimyhÿ.

<sup>43</sup> Idi tahe ritỹxinyre waòinatxi reurò weririmy orotxu yre yre utura-wana rauhenyredi. <sup>44</sup> Kia heka rerỹsỹre 5000 inymy rỹsỹna-di.

<sup>45</sup> Juhu Jesuisi riteònyre taerydỹỹna mahãdu ixiko-ò kanaijõwe-ribi ijã-ò, Besaida hãwã-ò. Tii tahe ririre iny riteònykremy. <sup>46</sup> Tahe riteònyreu, tii rare ixitòedỹỹmy bede ratòòhòkỹ-ò. <sup>47</sup> Txioro bedesou hãwò ahotya-ki ratximyhỹre. Jesuisi suki ratximyhỹre ixisohojile. <sup>48</sup> Tahe yhy rebònymhỹ iutedereny-ribi. Hãwò rariaõlemyhỹ. Tahe Jesuisi tuu robire txu ijera iòhò-di. Tahe betyredile tamyreny rariare. Jesuisi iratyreny wese rariakre. <sup>49</sup> Tahe tuu robireu, betyre-di rariarerìò, tiiboho unisỹna rõhõtynyreny, rira-juareny. <sup>50</sup> Tahe ibutumy tuu robira ibutumy ruberurennyre. Jesuisi aõwesele rarybere: —Urile beysabeny, breburennyõmy. Jiarỹle watxireri. <sup>51</sup> Tii ralore tamyreny hãworo-ò. Yhy urile ixãwire. Ierydỹỹnaboho bede riòtiynyreny. <sup>52</sup> Tiiboho ruberurennyre, orotxu bedeòbyna dori rierykõrennyre.

<sup>53</sup> Tiiboho riòhòrennyreu, ritehemynyre Kenesare-ò. Kia-ki hãwò ritisarennyra. <sup>54</sup> Tahe hãworo-ribi ròtuòreriu, ibutumy iny Jesuisi rieryra. <sup>55</sup> Juhu raòrunnyrennyre bina bina mahãdu òrysymy. Idi tahe didydenyde roholarennyre titxibo tai Jesuisi ratximyhỹò. <sup>56</sup> Tii raloreu iny hãwã-ò aõbo ada hãwãhãkỹ-ò aõbo ada bedero-ò aõbo, tiemy iny bina bina mahãdu iryko-txi ritidire. Tai tamy rexitòenihikỹre tamy debò reakemy ityynora-ò. Ibutumy tamy debò reareu, tahe riteytennyre.

## 7

<sup>1</sup> Jesuisi-ò ributunnyre fariseu mahãdu lahi

rybe-di erydÿÿdu mahãdu wahe. Tule bede ywina erydÿÿ mahãduributunyre. Jerusalẽ-ribi ritehemynyneri. <sup>2-5</sup> Jesuisi erydÿÿna mahãdu tebò risuhòomy riroxireri. Fariseu mahãdu, Bede ywina erydÿÿ mahãdu-wana Jesuisi-ò ritÿÿraxinyrenyre: —Aõherekibo aerydÿÿna tebò risuhòomy riroximyhÿrenyre. Aõherekibo ihetxiu bede ywidÿÿnana rityhynyõreri. Lahi rybe-di erydÿÿdu mahãdu judeu mahãdu-wana ihetxiu iwidÿÿnana riwinymyhÿrenyre. Tii heka tebò tiu suròduõmy riroxiõmyhÿre. Tiiboho aõna aõna wydyna heto-ribi dòðsemahãdeu, tiu heka rõhõðdile riroxiõmyhÿre. Sõwemy iwidÿÿnareny rityhynymyhÿre. Bemona butxi, womati bese-wana risuhòrenyre. <sup>6</sup> Jesuisi tamy dirawyònyde: —Isaia juhuule rarybere tiwesebo kaiboho toite. Kaiboho itxenadÿÿdu toite. Riritinyu rÿire:

—Kaiboho riwawowydynymyhÿre tary-di. Tahe awo-ribi waluuõlemyhÿre.

<sup>7</sup> Kaiboho riwawowydynyre tahe watxi nohõti ijeraõlerenymy. Kai teerynanyteri erydÿÿna-di iny nohõti-ribi namyhÿdeòle.

<sup>8</sup> Kai Deuxu erydÿÿna tyhydÿÿõmy. Iny erydÿÿnale tetyhynytenyte. <sup>9</sup> Tii tamyreny rarybera: —Kaiboho aõbo ijõ bihõrõnybenyleke, biaõmysÿnybenyke. Deuxu rybe bede ywina kaiboho tetyhynyõlemyhÿtenyte. Arybe bede ywinale tetyhynyõlemyhÿtenyte. <sup>10</sup> Moisesi rarybera:

—Kaiboho biytyhynybenyke adirybe-ò, tybyrybe-ò. Inyõ tadimy tybomy iehehemy

rarybekeki, aõtaxiny ruruke.

<sup>11</sup> Kaiboho teerynanyteri hãbuõ-ò tadi tybywana-ò rarybekemy: —Wanieru waribi bitaõke. Ariwahiny dori Deuxu-ò. Wanieru heka korbÿ rare. (Korbÿ heka uri wahidÿÿna rare, iwitxira rybe wahe.) <sup>12</sup> Jesuisi rarybehyymy rare: —Kiawese rierynanymy raremyhÿ, kaiboho uritere hãbuõ tadiboho-ò aõmydÿÿõmy rarekemy. <sup>13</sup> Kawese ityhydÿÿrenyõmy Deuxu rybe, aerydÿÿna òraru-ki. Sõwemy aõna aõna kawese tatÿÿnytenyete. <sup>14</sup> Tahe Jesuisi ixityre rarybera inysõwe-ò: —Bodoholabenyke, ibutumy bierybenykemy. <sup>15</sup> Aõbo iny-ò ralòmyhÿre, kia tahe iny risunyõlemyhÿre, inywo-ribi tahe namyhÿde kia tahe iny risunymyhÿre. <sup>16</sup> Inyõ bierybenykeki, boholawibenyke. <sup>17</sup> Tahe iny-ribi ròhònyreu, heto-ò raloreu, ierydÿÿna mahãdu tahe tamy rÿÿraxire ijyymy. <sup>18</sup> Tii tamyreny rarybere: —Kaiboho tule aõbo teeryõmahãtenyete. Aõbo iny-ò ralòmyhÿre, kia iny risÿnyõlemyhÿre. <sup>19</sup> Tawotyhy-ò dori ralòõlemyhÿre. Urile weryri-ò ralòmyhÿre idi umy-ribi ròhònymyhÿre. (Ibutumy rÿsÿna tahe awire riki.) <sup>20</sup> Tule rarybere: —Aõbo iny-ribi namyhÿde, kia risurisenymyhÿre. <sup>21</sup> Inywo-ribi tahe ròhònymyhÿre ibutumy nohòtinana binahakÿ. Kia heka rare nohòtinana binahakÿ: òta òtalemy, wasilemy, rubudÿÿlemy, ijõ hãbu riòrese ridymy, <sup>22</sup> ibutumy aõna aõna wedu iny ratyrekemy, binamy rõhòtinymyhÿre, ruilemy, aõbina binaõle, itxeredu, aõbina binalemy rybedu, tule itxÿtelemy. <sup>23</sup> Kia heka ibutumy bina bina inywo-ribi namyhÿde. Kia heka iny

rexisunymyhÿre.

<sup>24</sup> Jesuisi rexitare. Tahe r re Tiro hãwãreny-ò, Sidõ beà hãwã hãwã-ò. Tahe tii ralore hetowo-txi tahe moõ rierykõdi ixidire hetowo-txi. Ralòrau tahe, rexiwòke aõkõ. <sup>25</sup> Jesuisi tyhynina-ò hãwyy roholare, tahe tamy nade, tatiowotimy re-sere. Iriòre-riki tyytybybina dire. <sup>26</sup> Kia heka hãwyy Grego mahãdu rare. Ilahinanire heka Siru Senisia. Tii Jesuisi-ò rÿÿraxire tyytybybina iriòre-ribi deòdÿÿmy. <sup>27</sup> Tahe Jesuisi tamy rarybere: —Txioiny, juhu inihe uladu mahãdu riroxikre. Wadee awiòre uladu-ribi rÿsÿna ritake ijòròsa-ò. <sup>28</sup> Hãwyy rirawyònyra: —Inatyhy rare, Wãhĩ. Kurile rÿsÿna kyre kyre rejujumahãre. Kòwòruku bese-ribi, kuladu-ribi. Kiamy heka itxoòròsa rirakuximyhÿre. <sup>29</sup> Tahe Jesuisi tamy rarybera: —Kia rybe óraru-ki heka kaa tarybeta tyytybybina ariòre-ribi rohonyra. Kia bòòsekre aheto-ò. <sup>30</sup> Hãwyy taheto-ki rehemynyreu, iriòre-ki rahara byretyre-ki roire. Hãwyy rieryre tyytybybina iribi ròhònyre.

<sup>31</sup> Tai tahe Jesuisi ixityre rexitare Tiro hãwãreny-ribi, Sidõ beà hãwã ren-y-ò rara Kalileia aho-ò. Tii raremyhÿu, Debòwiò hãwã hãwã ren-y-ririre. <sup>32</sup> Tahe tamy didydenyde hãbuõ nohõtityõ. Tii roholaõlemyhÿre. Tule awimy rarybeòhyylemyhÿre. Tahe rexitòenyrenyra Jesuisi-ò, tebò ityre ritidikemy. <sup>33</sup> Jesuisi tii ritare inysòwehekÿ-ribi tahe tebò ritidire tòhòti-ò. Tahe rarybexinyre tahe idi tòròtòbymy reare. <sup>34</sup> Tahe Jesuisi tarue ruwyre biu-txi, ele-di reare. Tahe rarybere: —Ebata. (Kia heka rybe

riwiuròsòdỹmy rare, —Biraynyke.) <sup>35</sup> Aõwesele tõhõti riraynyre. Tòròtò riykoykonyre. Tii aõwesele awimy rarybere. <sup>36</sup> Jesuisi rarybere: —Uritere iny-ò ijyyõmykremy. Ihãrele tahe ibutumy kiamy iny-ò relyymyhỹre. <sup>37</sup> Idi bede riòtiinyrenyire. Tahe raryberenyre: —Ibutumy tii riteytenymyhỹre. Tii nohõtity aõwesele roholamyhỹre. Hãbu rybeõ aõwesele rirybedỹnymyhỹre.

## 8

<sup>1</sup> Kia txuu ixityre iny sõwemy ributunyre. Kiau tule aõrỹsỹnamy ijõõhyylere. Jesuisi taerydỹna mahãdu ixidee ributunyre. Tahe tamyreny rarybere: <sup>2</sup> —Jiarỹ inysõwe rewotønyreri. Tiiboho txuu inataõ waki rỹireri byreõlemy. <sup>3</sup> Jiarỹ byreõlemy ariteønyrenykeki, ryrowetyakile reserenykre iòderawyrinymy. Tule, iny sõwemy irehe-ribi nade. <sup>4</sup> Ierydỹna tamy dirawyònyde: —Timytaka inyboho tamyreny orotxu rikiwahinyrenykre kabederahy-ki. <sup>5</sup> Tii ritỹraxyre: —Tiwesebo orotxu kai ijõdire. Tiiboho rarybere: —Debò inatxi reuròmý. <sup>6</sup> Jesuisi iny sõwemy risỹdỹnykremy sutyre-ò. Tii orotxu debòinatxi reuròmý rimyra. Tii rexitønyreu tahe riorore. Tahe riwahinyre taerydỹna mahãdu-ò riwykemy iny sõwe-ò. <sup>7</sup> Tule utura ibutemy rỹimyhỹ. Tahe rexitønymy rahudi tahe taerydỹna-ò rarybere: —Kaa tule biwybenyke iny sõwe-ò. <sup>8</sup> Tiiboho riroxirenyremy tahe rihydymy ratximyhỹ. Iyre yre rauhenyre riwyrenyre weriri debò inatxi reuròmý riwyrenyre rỹiximy. <sup>9</sup> Inaubiòwa mil iny iòhòmý rỹimyhỹ. Tahe Jesuisi rexideòwarinyre iny sõwe-ò.



<sup>10</sup> Tii ralore hãworo-ò taerydỹỹna-wana. Tiiboho roire Damanuta hãwãreny-ò.

<sup>11</sup> Lahi rybe-di erydỹỹdu mahãdu nade fariseu mahãdu wahe. Tiiboho tamy nade rybe òbitidỹỹmy. Tiiboho rỹỹraxirenyra bede erydỹỹnaõ kiditeòsinykremy. Lahi rybe mahãdu rierykemy tii inatyhy rare urenana. <sup>12</sup> Tii raelewesenanyre tawo-ki rarybere: —Aõherekibo kaa iny mahãdu rỹỹraximyhỹre bede erydỹỹnamy. Inatyhymy jiarỹ ararybekre: —Bede erydỹỹna heka tamy rawahidỹỹõtyhy. <sup>13</sup> Tahe idi Jesuisi rexitare. Hãworo-ò ralore. Idi rohorere kanawe-ribi ijà-ò.

<sup>14</sup> Ierydỹỹnaboho tahe tõhõti rosare orotxu wydysy-ribi. Sohojityhyle heka orotxu roimyhỹ hãworo-ki. <sup>15</sup> Jesuisi tamy ribedeerynyre: —Beteheiny, biyrubuny, lahi rybe mahãdu, Herodi mahãdu-wana wirỹsỹna uri-ribi. <sup>16</sup> Jesuisi erydỹỹna mahãdu ixideele rarybere: —Aõherekibo Jesuisi kia rarybereri. Inyboho iorotxurenyõreriki òsana. <sup>17</sup> Jesuisi heka rieryra tahe rarybera: —Aõherekibo raryberemy orotxu ijõõremy. Kaiboho aõbo teerytenyõte. Kaiboho aõbo arawoxierinyrenyõre.

<sup>18</sup> Kaiboho aõbo arueõrenyre. Tabiõletenyteri. Kaiboho aõbo itxi õhõtireny reaõlereri.

<sup>19</sup> Jiarỹ 5000my iny-ò orotxu reareareu, tiwesebo weririmy orotxu yre yre-di ritỹxinyre. Tahe tiiboho rirawyõnyre: —Waòinatxi reurò weririmy.

<sup>20</sup> Tahe debòinatxi reurò orotxumy reòròra 4000 inymy, tiwesebo weriri orotxu yre yre-di ritỹxinyre. Tiiboho rirawyõnyre: —Debòinatxi

reuròmy. <sup>21</sup> Tahe tamyreny rarybere: — Timyrekibo tahe teerytenyõte.

<sup>22</sup> Dehemynyde Besaida hãwã-ò. Tahe hãbu ruetà-di tamy didydenyde. Rexitòenyrenyde tamy debò reakemy. <sup>23</sup> Jesuisi tebòmy rimyre tahe ridyre hãwã-ribi bederahy-ò. Iruetyre rarybexinyre. Tebòmy tamy reare. Tahe ritỹĩraxinyre: —Aõmybo aõbo tabiteri. <sup>24</sup> Hãbu tahe biu-txi tarue riukora, tahe rarybera: — Hãbumy rabira, òwòru wese rỹireriò, rariareri. <sup>25</sup> Ixityrele Jesuisi tebò reare irue-ò. Hãbu heka irue reyteramy òbitilemy retehereri. Robire irehetyhy-ò itỹnyhỹkỹlemy. <sup>26</sup> Tahe Jesuisi riteònyre isỹ-ò urile ihãwã-ribi ròòseõmykre.

<sup>27</sup> Jesuisi taerydỹĩna mahãdu-wana ròhònyrenyde Sesaria Filipi hãwãreny-ò. Ryki taerydỹĩnareny-ò ritỹĩraxinyre: —Mowe hãbureny wamy raryberenyra jiarỹ raremy. <sup>28</sup> Tiiboho rirawyònyra: —Joaõ Sebedỹĩdu riki, ijõ Eliasi riki, ijõ riki Deuxu rybedỹĩduõ. <sup>29</sup> Tahe Jesuisi tamyreny ritỹĩraxinyra: —Kaiboho, mobo tarybetenyte jiarỹ raremy. Tahe Pedro rirawyònyre: —Kai Kristu atximahãte. <sup>30</sup> Tii raraybinihikỹmy ixi-ki rarybera: —Inyko wamy ijyyõmykre.

<sup>31</sup> Jesuisi rexiranyre erydỹĩmy: —Deuxu Riòre Hãbutyhyhykỹ heka aõna aõnamy aõhõkỹmy rotỹĩnynihikỹkre. Matuari mahãdu heka ixideramy ryanakre. Tule Deuxu aõmysỹdỹĩdu wedu, Bede ywina erydỹĩ mahãdu ixideramy ryanakre. Jesuisi kudurukre idi tahe txu inataõ rỹidi kedexixakre rubu-ribi. <sup>32</sup> Idi

tahe idùrurehekỹlemy tamy rarybere. Pedro iny-ribi Jesuisi ritare, tahe tamy rarybere: —Kawese rybeõmyreke. <sup>33</sup> Jesuisi ròõsemy reare, retehemyhỹ taerydỹỹna-ò tahe Pedro-ò rarybere: —Bexitake wako-ribi Satanasi. Kai dori Deuxu ijoi aõkõ atximahãte. Kai hãbu ijoi tate. <sup>34</sup> Jesuisi ributunyre iny sõwehekỹ, taerydỹỹna-wana tahe rarybere: —Inyõ wahemy kanakeki, ixideele rexirahĩke, tahe taitxeò rimyke riwaheludunykemy. <sup>35</sup> Mobo taumy tarasamy rurukeki, riononykre. Tahe aõtxile iny waluukeki, Rybewihikỹ luukeki, taumy wadee riononykeki, kia heka taumy ritakre. <sup>36</sup> Aõbo tahe awire, ibutumy aõna aõna bitake tai aumy biononyke. <sup>37</sup> Aõbo tahe iny riwahinykre taumy wydyna òkesena aõbo. <sup>38</sup> Kai wijinabòdu òrarudu mahãdu rare, òta òtadu rare. Aõtxile iny walau warybe lau raixỹrukeki, tule Deuxu Riõre Hãbutyhyhykỹ ilau kanaixỹrukre tii nadeu ýjuwihikỹ-di boo wowydyna-ò.

## 9

<sup>1</sup> Tii tamyreny rarybere: —Inatyhymy adeereny ararybekre. Ijõõ kaki ratximyhỹre ruruõtyhy Deuxu Iòlònu taruru-di kedehemynykreu.

<sup>2</sup> Tahe debò sohoji txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire. Jesuisi tamyreny rexiwitxiranyre. <sup>3</sup> Ityy heka urile rabòtòranyre. Iurahakỹmy relere suròna ratyre heka rauranymy ritoosònyre. <sup>4</sup> Tahe tamyreny dexitỹnynyde Eliasi, Moisesi-wana tahe rarybemyhỹre Jesuisi-wana.

<sup>5</sup> Pedro rarybere Jesuisi-ò: —Wawedu, awityhymy

inihe kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. <sup>6</sup> Pedro rieryõlemyhÿre aõmybo rarybekemy ruberumyhyremy. <sup>7</sup> Nonoe dobehede iubòròna bedede ritòbònyre. Tahe rarybere reare rybeuni iy-ribi: —Kia heka wariòre waluu rare. Kaiboho tamy bohola benyke. <sup>8</sup> Tiiboho reteherenyre tahe inyò robiòlerenyre. Jesusilemy robirenyre.

<sup>9</sup> Dohedeu tahe inydee Jesuisi rarybere: — Uritere inyò-ò tuu ijyyõmykre aõmybo tobitemy. Uritere Deuxu Riòre Hãbutyhyhykÿ rubu-ribi rexixareu, tai tahe tuu belyybenykre. <sup>10</sup> Kia rybe wasimy riworenyre. Ixideerenyle wii ritÿÿraxinyrenyre: —Aõmybo rarybereri, rubu-ribi rexixamy nade. <sup>11</sup> Tiiboho tamy rÿÿaxirenyre: — Aõherekibo bedede ywina erydÿÿ mahãdu rarybere Eliasi juhu kanakremy. <sup>12</sup> Tii rirawyònyre: — Inatyhymy, Eliasi juhu nade. Ibutumy aõna aõna riywinykremy. Tewesebo raritinanymy rÿireri: — Deuxu Riòre Hãbutyhyhykÿ aõna aõnamy aõhòkÿmy rotÿÿnynihikÿre. Tahe tii inydee awiòhykre. <sup>13</sup> Adeereny ararybekre: —Eliasi nade. Tule iny ixideewilemy tamy riwinyrenyre. Kaheka iaõmydÿÿnana riritinanymy rÿire.

<sup>14-15</sup> Jesuisi dehemynydeu taerydÿÿna mahãdu-ò, tahe robire iny sòwehekÿmy tahe bedede ywina erydÿÿ mahãdu taerydÿÿna-wana ritxiõnymyhyre. Tahe Jesusimy robireu, tahe tiiboho riumysaõnyrenyre. Raòrunyrenyre irybedÿÿmy. <sup>16</sup> Tamy rÿÿraxire: —Aõmybo tamyreny tatÿÿraxinyteri. <sup>17</sup> Inyò rirawyònyre: — Erydÿÿdu, wariòre adee redyneri. Tii tyytybybina

rybeõhõkỹ-di ratxireri. <sup>18</sup> Tyytybybina rimyreu tahe riatorye bede-ò. Idi tahe urile txuu riyiyinyre. Tahe tii rubureriwesele roire. Aerydỹỹna-ò jiarỹ rarybera tyytybybina riteranykremy, tahe tiiboho iruruõhyymyhỹ. <sup>19</sup> Jesuisi tamyreny rarybere: — Tiwesebededỹỹnanabo wjinabòdu ityhyõlemy rỹira. Tiwesebededỹỹnanabo awanareny ariijekemy. Wadee uladu bididyke. <sup>20</sup> Tahe didydenyde Jesuisi-ò. Jesuisimy robireu tahe tyytybybina urile raitxỹteitxỹtenemy resere. Idi tahe urile bede-ki rara òhòremy raratymyhỹ rybexi irywomy ròhònymyhỹ. <sup>21</sup> Jesuisi rỹỹraxire uladutyby-ò tiubedemybo taheka kaa binana tamy dehemynde. Tii rarybere: — Uladuylaule idi ròrarunyre. <sup>22</sup> Tiwese wese aõkõ idi rehure bera-ò, heòty-ò rahukemy. Aõ biwinykeki, jiarỹboho biwawiòhenanyke wijile. Kai biwaruxetòenybenyke. <sup>23</sup> Jesuisi rarybere: —Kai bityhynykeki, ibutumy aõna aõna rỹimyhỹre. <sup>24</sup> Aõwesele uladutyby ryryre idi tahe rarybere: —Jiarỹ retyhynyre, biwiòhenanykre aõbo rauhenyre. <sup>25</sup> Jesuisi iny sõwemy robire wii rotyrerimy, tahe riteranyre tyytybybina-ò: — Kai tyytyby rybeõ tule roholaõ iribi bòhònnykre, tiu ixityre malòõtyhy. <sup>26</sup> Tyytybybina ryryre. Uladu ritxỹtenyre idi tahe ròhònnyre. Uladu rubuwesele roire herimy. Tahe iny sõwemy rarybere: —Tii rurura. <sup>27</sup> Jesuisi rimyre tebò ritamadỹỹnyremy tahe uladu rỹire lamamy. <sup>28</sup> Heto ralorenyreu ierydỹỹna mahãdu tamy rỹỹraxirenyre: —Aõherekibo jiarỹboho tyytybybina riteònyõrenyra. <sup>29</sup> Tamyreny rarybere: —Kaiboho

bexitòenybenykeki byreõna-di bonybenykeki, kiawesele heka ròhònyke.

<sup>30</sup> Iribi ròhònyreu, Kalileia lowysy-di roirenyre. Jesuisi heka inyerydỹỹderamyhỹ tai ratximyhỹki.

<sup>31</sup> Taerydỹỹna mahãdu Jesuisi rierynanymyhỹre. Jesuisi tamyreny rarybere: —Deuxu Riõre Hãbutyhyhykỹ heka rawahidỹỹkre hãburenyõ-ò. Tii hãbureny rirubunykre. Idi tahe txu inataõ txuu rỹidi tahe kedexixakre rubu-ribi. <sup>32</sup> Tiiboho rierykõlere tahe ruberurenyre tỹỹraxidỹỹki.

<sup>33</sup> Idi tahe rehemynyre Kafanaõ-ò. Ralore heto-ò. Jesuisi tamyreny rỹỹraxire: —Aõmywe widee tarybetenyteri ryro-ki. <sup>34</sup> Tiiboho urile roholarenyre rybeõlemy. Ryro-ki dori rarybemyhỹ mowexe wiribi aõnimy ròhònykre. <sup>35</sup> Tahe Jesuisi ronyrenyredi, Jesuisi taerydỹỹna mahãdu ributunyre erydỹỹmy: —

Inyõ juhuludumy rarekemy ratxikeki, tai heka tii ihewoludukre. Tule tii reakre ibutumy deòdumy. <sup>36</sup> Tahe Jesuisi uladuõ rimyre risỹnyre iubetya-txi tahe taerydỹỹna-ò rarybere: <sup>37</sup> —Moõ uladu kawese wadee riwiòhenanykeki, riwawiòhenanyre. Moõ riwawiòhenanykeki, tule wateòdỹỹdule riwiòhenanyre.

<sup>38</sup> Joaõ tamy rarybere: —Erydỹỹdu, jiarỹboho tuu rabirenyra inyõ tyytybybina-di ani-ò rehureriò. Tahe iny mahãdureny aõkõ rare. Tahe jiarỹboho tamy reijõnyrenyre iny mahãdureny dori aõkõ rare. <sup>39</sup> Tahe Jesuisi rarybere: —Biijõnybenyõkre. Inyõ wani-di bedeòby riwinykeki, wanimy heka ibinamy rarybeõtyhy. <sup>40</sup> Iny òluduõkeki, tii heka iny ijoi rare. <sup>41</sup> Inyõ

beõ adeereny waninamy riwahinykre-wana, kai waerydỹna dori tate, inatyhymy adee ararybekre. Tii tawahidỹna ritakre. <sup>42</sup> Inyõ kaa uladu ityhydỹdu riatykre òraruna-txi, kia heka tamy awire tòti-ki myna ritaamy idi bera-txi rehure. <sup>43</sup> Ebòle araatykeki òraruna-txi, juhuule adee awire ebò biòròke. Kia heka awityhykre iny welytyle ralokre biu-ò, tahe awiõtzyhykre heòtytòteehekỹ-ò ralòkeki debò inatxi-di. <sup>44</sup> [Tai mohõ ruruõtzyhy. Heòty ruruõtzyhy.] <sup>45</sup> Awa araatykeki òraruna-txi, juhuule adee awire awa biòròke kia awire iny rariake awa sohojilemy, awiõre heka heòtytòteehekỹ-ò ralokre awa inatxi-di. <sup>46</sup> [Tai mohõ ruruõtzyhy. Heòty ruruõtzyhy.] <sup>47</sup> Arue araatykeki òraruna-txi, bitake idi behuke juhuule adee awire arue sohoji-di Deuxu Iòlò biu-ò ralokre, tahe awiõre heòtytòteehekỹ-ò ralokre arue inatxi-di. <sup>48</sup> Tai mohõ ruruõtzyhy. Heòty ruruõtzyhy. <sup>49</sup> Ibutumy iny heka heòty-di rijyyranykre. <sup>50</sup> Jyyra heka awire, saa wahe. Urile taruru riononykeki, tiwesebo tarỹsỹna uri ixybyle tawo-ki bitidikre. Kaiboho ibutumy widee eysarenlyere.

## 10

<sup>1</sup> Jesuisi iribi rexitare. Tahe rare Judeia bedede-ò, tule Jordaõ kanawe-ribi ijà-ò. Iny sòwemy tamy ributunyre, tahe tiiboho Jesuisi rierynanyre. Tii reòarimy tuu ratximyhỹre.

<sup>2</sup> Tamy lahi rybe-di erydỹdu mahãdu dehemynydenyde irutaadỹrenemy. Tahe tamy rỹraxyre: —Hãbu aõbo tahãwyy ririleke, awire aõbo ibinare aõbo. <sup>3</sup> Tahe Jesuisi

tamyreny rirawyònyre: —Aõrybe bede ywina-di Moisesi rierynanyre. <sup>4</sup> Tahe tiiboho Jesuisi-ò dirawyònydenyde: —Tii rierynanyre iny tahãwyy ririkemy. Urile juhuu hãwyy bede erydỹỹna rybe tyyriti riwinykemy, idi tahe tahãwyy ririkemy. <sup>5</sup> Jesuisi tamyreny rarybere: —Õhõtixyre dori Moisesi kia rybe bede ywina adee riwahinyre.

<sup>6</sup> Juhu bedeu Deuxu

riwinyre hãbu, hãwyy-wana.

<sup>7</sup> Iurenana tahe hãbu tadibohosỹ-ribi ròhònymyhỹre tai roimyhỹre hãwyy-wana.

<sup>8</sup> Hãbu inatyhy hãwyy-wana roimyhỹreu, sohoji tyhylemy radenymyhỹre.

Iny inatxi inymy aõkõ rỹimyhỹre, sohoji tyhylemy rỹimyhỹre. <sup>9</sup> Hãbu hãwyy-wana

Deuxu ributunyreu, iny iwitxira wiribi ritòhòrarienyòtyhy. <sup>10</sup> Hetowo-ki tahe ierydỹỹna ritỹỹraxinyre kia rybe-ki. <sup>11</sup> Jesuisi tamyreny rarybere: —Aõtxile hãbuõ tahãwyy ririkeki tahe ijõ-wana roikeyi, kia heka òtadu rare. <sup>12</sup> Hãwyy tahãbu ririkeki tahe ijõ hãbu-wana roikeyi, kia heka wedena rare.

<sup>13</sup> Tiiboho tamy didydenyde uladu tamy debò reakemy. Tahe ierydỹỹna riononymy rarybere tamy idyrenyõmykre. <sup>14</sup> Jesuisi kiamy robireu, rikyaranyre rarybere: —Txiò, kididyke uladu wadee. Uladu wese dori Deuxu Iòlòna rare. <sup>15</sup> Inatyhymy ararybekre: —Moõ heka uladuwe-semy Deuxu Iòlòna ralòõkeki, kia heka Deuxu Iòlòna-ò ralòõtyhy. <sup>16</sup> Tahe Jesuisi rexiranyre uladu manamy taaxiò-ò rimyre. Tahe tebò iratyytyre ritidimy tamyreny rarybewihikỹre.



17 Tahe Jesuisi rydi raloreu, hãbuõ tamy reare. Tahe hãbu iko-txi resere tatiowotimy. Rarybere: —Erydỹỹdu wihikỹ, aõwexe ariwinykre biu-ò hena aritakremy tiiehyymy umywihikỹ-di ararekremy. 18 Jesuisi tamy rarybere: — Aõherekibo wihikỹmy wadee tarybeta. Hãbu awiõre. Deuxu sohojile tahe awire. 19 Bede ywina kai teeryte: rubudỹỹõmykemy, tule òta òtaõmykemy, wasiõmykemy, tule ruiõmykemy, iny wii itxenadỹỹõmykemy, adi bityhynykemy, boo tule. 20 Hãbu tamy rarybere: —Erydỹỹdu, kia bede ywina rewinyhyylere, uladuule wiji-ò. 21 Jesuisi tamy retehere tuu reðarire tahe rarybere: — Kai sohoji aõmydỹỹnale aki nasiranyde. Kai makre, ibutumy aõna aõna-di bòhònykre, idi tahe idi biwahinykre iny aõkõ mahãdu-ò. Kia tahe aõmydỹỹnadikre biu-txi. Tahe manakre biwaheludunykre. 22 Kia rybe-ki heka hãbu rabadewore. Rexitare ibedewomy urile iaõna aõna sõwetyhyreki.

23 Jesuisi retehemy iwerura-di tahe rarybera taerydỹỹna-ò: —Kia iny iaõna aõna sõwemy rỹireri, tamy Deuxu Iòlòna-ò ralòke isirare. 24 Ierydỹỹna mahãdu bede ribedeòtiinyrenyryre irybe-ki. Jesuisi ixityre rarybere: —Waexiboho, isiratyhy rare Deuxu Iòlòna-ò ralòkemy. 25 Kamelo tyyrorenawo-di ralòkemy isirakeki, kia-rihi isiratyhyre iny iaõna aõnadikeki ralòke Deuxu Iòlòna-ò. 26 Tiiboho bede ratiinyre sõwemy. Widee rarybere: —Mobo tahe iòraru-rihi iny ritakre. 27 Jesuisi iwerora-di retehere tahe rarybera: — Inatyhymy kõaõboka hãbu-ò isiratyhyre. Deuxu-ò

tahe ibutumy aõna aõna isiraõre. <sup>28</sup> Pedro rexiranyre rarybere: —Boholake, jiarỹboho ibutumy rerirenyra araheludunykremy. <sup>29</sup> Jesuisi rarybere tamy: —Inatyhymy adeereny ararybekre. Moõ waluukeki, rybewihikỹ luukeki, kia heka ririkre: heto, taseriõre, tyby tadi-wana, tariõre, tabede, ibutumy ririkre. <sup>30</sup> Wijile itarasamy rarekre: 100 sỹmy, 100 seriõre, 100 tybyboho, 100 tadibocho, 100 tariõreboho, 100 tabede. Iny tamy rarybebinanykre tule. Ijõ bedede kanakre tahe taumy tỹmyra-di tiemy rarekre. <sup>31</sup> Tahe sõwere juhu ludu ihewomy ròhònykre. Ihewo ludu ijõ iko-ò ròhònykre.

<sup>32</sup> Tiibocho rydi raòwònyrenyke Jerusalẽ hãwã-ò. Jesuisi heka rare ikorenymy. Ierydỹna mahãdu bedede ribedeòtiinyre. Tiibocho Jesuisi riheludunymy ihewo-ribi. Tahe Jesuisi reraòmyhỹ idi rare waòinatxi reurò taerydỹna mahãdu-wana. Tii relyyre ixityre aõbo ixidee kỹnyikremy. <sup>33</sup> Boholabenyke inybocho roirenyreri Jerusalẽ-ò. Kowa, jiarỹ Deuxu Riõre Hãbutyhyhykỹ, inyõ riwawahinykre Deuxu aõmysdỹdu mahãdu wedu-ò, bedede ywina erydỹ mahãdu-ò. Kia warubudỹmy riwawahinykre tori-ò. <sup>34</sup> Tiibocho kidiwalahikre. Watyke kanarybexinykre. Òhòte-di kidiwahãtenyke. Idi tahe kidiwarubunykre inataõ txu-di. Tahe rubu-ribi adexixakre.

<sup>35</sup> Joaõ, ijõ Txiau, wii Zebedeu riõre, tamy nade. Tahe rarybere: —Erydỹdu, kai aõma aõ wadeereny biwahinykre. <sup>36</sup> Jesuisi rarybere: —Aõbohe jiarỹ adeereny ariwahinykre.

37 Tahe tamy rarybere: —Kai, aiòlònasỹ-ò kedehemynykreu, aruruwe-ribi aronykre, waseriòre ahywewe-ribi ronykre. 38 Tahe Jesuisi rarybere: —Kaiboho teeryòlemahâte aõmybo textitòenyteri. Kaiboho aõbohe wabemona-di biõbenyke idi Jerusalẽ-ò adiõkremy wahãredi. Kaiboho aõbohe wasebena-di mohõlebenyke idi jiarỹ anohõkremy wãhãredi. 39 Tiiboho dirawyõnyde: —Kohe tulekre. Jesuisi tamyreny rarybere: —Bemona-di ariõkre kaiboho tule idi biõbenyke. Sebena-di jiarỹ adohõkremy, kaiboho tule idi mohõbenykre. 40 Tahe mobo wabire ronykre ruruwe-ribi hywewe-ribi kia heka jiarỹle ariwahinyõkre. Kia tahe iyrubudỹmy rỹireri Deuxule kidiwahinykremy. 41 Tai debòwiò erydỹna mahãdu heka Joaõ-ò, Txiau-ò tamyreny iky reare. 42 Jesuisi tamyreny ryryre tamy kanakemy, tahe rarybere: —Kaiboho teerytenynte toriweðu irurusõwe dire. Iny nihikỹ heka iny my deòdu luure. 43 Jesuisi kiamy rarybere: —Kia wese tahe aworeny-ki aõkõkre. Kaiboho aõtxile mobo bõityhynyhyykre, ijõ iny deòdumy rarekre. 44 Mobo juhutyhy rarelekre, deòdumy rarekre. 45 Deuxu Riòre Hãbutyhyhykỹ nade teòdu sõwekemy aõkõ tahe ixilemy reòdunykemy. Nade taumy wahidỹmy sõwemy iny tarasamy.

46 Idi tahe roire Ijeriò hãwã-ò. Jesuisi taerydỹna-wana iny sõwehekỹ-wana ròhònyrenyra. Tahe rahare Bartimeu ruetàhàkỹ-ki. Bartimeu tahe Timeu riòre rare. Tii ronyre rywe-ribi aõna aõnamy rexitòenyteri. 47 Tii roholare Jesuisi Nazare ludu kia rare tahe tamy ryryra: —Jesuisi, Davi

riòre, wadee maruxetòekre. <sup>48</sup> Sõwemy tamy rarybere: —Rybeõmyke. Tahe aõhe-wana tii rarybemyhỹre: —Davi riòre wadi mawotòeke. <sup>49</sup> Jesuisi riyryre tahe rarybere: —Tamy byryke wadee kodoikemy. <sup>50</sup> Tahe rexitareu rỹire, wylemy nade Jesuisi-ò. <sup>51</sup> Jesuisi tamy rarybere: —Aõmybo kai taruteri adee ariwahinykremy. Tahe hãbu ruetàhàkỹ tamy rarybere: —Wawedu, ixityre arobikremy. <sup>52</sup> Jesuisi tamy rarybere: —Makre, atyhydỹna kai arateytenyra. Kialehe rare. Aõwesele ixityre tii robire. Tahe Jesuisihemy rare, ryki.

## 11

<sup>1</sup> Jerusalẽ iòhòmy ritehemynyrenyreu, tahe inatxi taerydỹna riteònyra hãwã-ò. Inatxi hãwã-ò iòhòmy, Betabaji, Betỹnia-wana. Kia-ò Oliveira hãwãlò roire. <sup>2</sup> Jesuisi rarybere: —Kaiboho boikre kowa hãwã-ò. Kowa-ò birònykreu jumentinho mahabenykre. Moheka ityre rariaõlemy ratximyhỹre. Bieseke, wadee bididyke. <sup>3</sup> Inyõ adeeremy rarybekeki: —Aõhekremybo idi atxitenyteri. Tahe tamy marybebenykre: —Wanyrỹ tuu rurureri. Ixityre kaò kidiòkesedỹnykre. <sup>4</sup> Tahe hãbu roire. Jumentinho ryro hetoijò-ki ritisanymy rỹimyhỹ. Tai riesere. <sup>5</sup> Kia hãwã mahãdu rarybere: —Aõherekibo jumentinho kaiboho tetatenyta. <sup>6</sup> Tai tiiboho Jesuisi rybe tamy riwahinyra. Tai hãwã mahãdu jumentinho riwahinyre. <sup>7</sup> Tahe ridyrenyre jumentinho Jesuisi-ò. Tiiboho tatyreny ritidirenyre jumentinho tyremy. Tiiboho risỹnyrenyre Jesuisi ityre-ò. <sup>8</sup> Ijõboho tahe

horerule ritidire ryromy, ijõ tahe tauwõhi ryromy ritidire ityre rariakemy. <sup>9-10</sup> Ihewo ludu, iko ludu rawyhyrarõnyreri, tule ryrereri: —Tii heka wowydyna rare. Tii heka Wanyrỹ niwesekemy naderi. Wowydyna rare iny labie Davi Iòlòna. Kai Iòlòna kanakre. Wyhyrarò biu-txi kodoholakre.

<sup>11</sup> Kia wese Jesuisi ralore Jerusalẽ-ò. Dohodỹỹna heto-ò ralore, ibutumy retehere, idi tahe ròhõnyre txiorotyhyreki. Tahe Betỹnia-ò roirenyre.

<sup>12</sup> Ijõ txu biòwamy tahe Betỹnia-ribi rexitarenyreu tahe tii rama rahure. <sup>13</sup> Òwòru figueira rademy robirenymy irehe-ribi. Tahe tamy ritehemynyreu iraty-ki raharenyõlere, aõmyreki figueira raty bededỹỹnanamy aõkõ bede rỹimyhỹre urenana. <sup>14</sup> Òwòru figueira-ò Jesuisi rarybere: —Tiu heka moõ araty ritòõtyhy. Tahe ierydỹỹna roholare.

<sup>15</sup> Tahe ritehemynyrenyreu Jerusalẽ hãwã-ò. Tahe Jesuisi dohodỹỹna hetowo-ò ralore. Tahe kia-ribi aõna aõna-di rohonymyhỹre mahãdu, õbradu mahãdu diteònyde. Tahe nieru wibydỹỹdu mahãdu, òwòrubesedỹỹ-di Jesuisi rehure. Bòtòe dinodu mahãdu rynana-di Jesuisi rehure. <sup>16</sup> Inyõ heka ritxyydỹỹnyõlere dohodỹỹna hetowo-ki. <sup>17</sup> Rierynanymyhỹre tahe tamy rarybere: —Raridỹỹõlemy aõbo rỹireri:

Waheto kõaõboka inatyhymy ibutumy iny wixira wixira dee ixitòedỹỹna hetomy rỹirakre. Waheto tewinytenyete wasidu hetowesele.

<sup>18</sup> Bede ywina erydỹỹ mahãdu, Deuxu aõmysỹdỹỹdu wedu mahãdu roholarenyreu, ròhõtinyrenyreu: —Timybo inyboho Jesuisi

rubudỹmy rokiwisỹnykre. Tiiboho  
ruberumyhỹrenyre iny sōwemy dori bede  
riòtiinymhỹ ibedeerydỹnaren-yki.

<sup>19</sup> Txioromy dehemynydeu, tiiboho  
rexitarenymhỹre hãwãhãkỹ-ribi.

<sup>20</sup> Txu ròhòny-di, rehemynyrenyre òwòru  
figueira-ò. Tiiboho robirenyre rarubumy rỹireriò,  
taru-wana, tararoti-wana. <sup>21</sup> Pedro ixì-txi tōhōti  
reare tahe rarybere: —Erydỹdu, betehe inihe  
aõma òwòru figueira rarubumy rỹire arybebina-di  
tamy tarybetaki. <sup>22</sup> Jesuisi dirawyònyde: —  
Kaiboho Deuxu bityhynymhỹbeny. <sup>23</sup> Inyõ  
rarybekeki kaa bede ratòòhòkỹ-ki: —Kai myike,  
adi adehu rỹikre berohokỹ-ki. Tahe irybe heka  
kedelekre. Tai inyõ rityhynykeki, tummy heka  
kedelekre. Tahe uritere iseõdỹỹõmykre urile  
bityhynykre, irybe heka kedelekre. <sup>24</sup> Iurenana  
adee ararybekre: —Aõtxile aõ bexitòenykre, kia  
heka bitakre. Bityhynykeki, inatyhummy bitake.  
<sup>25</sup> Kaiboho texitòenytenyteri wana aõbo inydee aky  
reamyhỹre kia biixãwididỹnymhỹke ratximyhỹre,  
Deuxu dori riixãwididỹnyke aõrarureny-ribi. <sup>26</sup> Kai  
iny wixira òraru biixãwididỹnyõkeki, boo biu-ki  
ratximyhỹre aõraru riixãwididỹnyõkre.

<sup>27</sup> Tiiboho ixityre doide Jerusalē hãwã-ò.  
Ririranyhỹrenyreu dohodỹna hetowo-ki, bede  
ywina erydỹ mahãdu, Deuxu aõmysdỹdu  
wedu mahãdu, matuari mahãdu tamy doide.

<sup>28</sup> Tiiboho tamy ritỹraxyrenyre: —Mowe  
ateòdỹdu kia aõna aõnamy tatỹnymhỹte.

<sup>29</sup> Jesuisi dirawyònyde: —Adeereny tule  
araỹraxikre. Kaiboho bidiwawyònykeki, tahe jiarỹ

akoreny ŷraxina arelyykre, aõrurudibo aõna aõna rewinymyhÿre. <sup>30</sup> Tahe Jesuisi rityÿÿraxinyre: —Ratyusebedÿÿna, Joaõ hõrõ, kia heka tiribibo nade, biu-ribi ada hãbu mahãdu-ribi. Kia manarybeke. <sup>31</sup> Tiiboho widee rarybera: —Biu-ribi inyboho raryberenykeki, tai tii rarybekre: —Aõherekibo tahe tii tetyhynytenyõte. <sup>32</sup> Hãbu-ribi inyboho raryberenykeki, iny aruberumyhyÿrenykre. Ibutumy iny rityhynyre Joaõ heka Deuxu rybedu raremyhÿ. <sup>33</sup> Tai tahe tiiboho raryberenyre: —Inyboho reeryõrenyre. Tai tahe Jesuisi rarybera: —Hebo, jiarÿ adee arelyyõtyhy modeòdÿÿdubo jiarÿ watrixeri.

## 12

<sup>1</sup> Iribi tahe Jesuisi tamyreny ijyy-di rierynanymyhyÿre: —Hãbu uva oworuõ wese ròbròre. Tahe riõtitynyre. Tahe hãloo riare oworuubetya-ki, ruÿdÿÿnymy. Tahe utò riwinyre. Idi tahe rihuòtere hãbu mahãdu-ò. Tahe rexitare tasÿ-ribi ijõ bede-ò. <sup>2</sup> Tahe bederatysiredemy bededÿÿnana rehemynyreu, iwedu teòdu riteònyre bederaty ritakemy. <sup>3</sup> Huòtedu mahãdu teòdu rimyrenyre, rihetenyre tahe riteònyre ixihyykemy. <sup>4</sup> Ixityre oworuwedu teòduõ riteònyre. Kia heka irati rihetenyre ta tamy rawobinarybenyre. <sup>5</sup> Ijõ riteònyre. Kia heka rirubunyrenyre. <sup>6</sup> Tahe oworuwedu iriòre sohojilere, tahe iluumy raremyhÿ ihewomy tii riteònyre. tahe wedu rarybere: —Wariòrele heka tiiboho rityhynyrenykre. <sup>7</sup> Kia huòtedu mahãdu widee raryberenyre: —Kia heka wedu aõna aõna tarasadu rare. Rikirubunykre tahe

iaõna aõna inydeerenykre. <sup>8</sup> Tahe rimyrenyre idi rirubunyre tahe idi rehurenyre oworu-ribi. <sup>9</sup> Jesuisi ritỹỹraxinyre: —Aõhebo tahe oworuwedu rotỹỹnykre. Tii kodoikre huõtedu mahãdu hudumy, tai tahe oworu riwahinykre inywixira-ò. <sup>10-11</sup> Ritina-di aõbo tariaõletenyte kia ryberiti:

—Mana-di hetowidỹỹdu rehura. Kia mana heka hetohàtxi-ki ritidimy doide. Kia heka Wanyrỹ riwinyre kia iny ruereny dee aõna aõna nihikỹ rare.

<sup>12</sup> Tai ijohonadu mahãdu Jesuisi mynymy ratx-imyhỹ tii dori rieryre ixidee lau Jesuisi ijyymy relyymyhỹre. Tiiboho ruberurenyre iny sõwehekỹ lau. Tahe rexitarenyre, rexixãwidinyre.

<sup>13</sup> Idi riteõnyrenyre Lahi rybe-di erydỹỹdu mahãdu, Herodi mahãdu-wana tamy imynamy irybe-ki. <sup>14</sup> Tiiboho rarybere Jesuisi-ò: —Erydỹỹdu, jiarỹboho araerymy adi watxiwãhãrenyre kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanyamahãte. Tahe tiiboho ritỹỹraxinyrenyre: —Awire aõbo ada ibinare aõbo nieru rawahinymyhỹre bede dinodu-ò. <sup>15</sup> Timybo tahe, rikiõwyny aõbo ada aõkõre aõbo. Jesuisi rierymyhỹre tõhõtinanareny, tahe ritỹỹraxinyra: —Aõherekibo kaiboho tiwaurihitenyteri. Wadee womati nieruõ bidiwy waitxerenamy. <sup>16</sup> Tahe tamy diwydenyde. Tahe tii ixityre ritỹỹraxinyra: —Kawe moõ tyytarasana rare, katahe moõ tyyritina rare. Tiiboho dirawyõnyde: —Kiahe bede dinoduhõrõ rare. <sup>17</sup> Jesuisi rarybere: —Hỹdebo, bede dinoduhõrõ tahe tamy biwahinybeny tule



tahe Deuxu aõna aõnahõrõ tamy biwahinybeny. Tiiboho bedede riõtiniyrenyre.

<sup>18</sup> Saduseu mahãdu tamy nade. Kia heka iny rubu-ribi rexixamy aõkõre-riki rierynanymyhÿre. Tiiboho ritÿÿraxinyre Jesuisi: <sup>19</sup> —Erydÿÿdu, Moisesi raritinyra bedede ywina-di: —Hãbuõ rurukeki, tahãwyy iriõre ijõdiõkeki, tahe kia hãwyy tahãbu seriõre-wana roike. Iriõredikre taseriõre rubuòwymy roikre. <sup>20</sup> Seriõre debòinatxi reuròmymy raremyhÿ. Juhuu ijõ roire hãwyy-wana. Tahe tii rurure iriõreõlemy. <sup>21</sup> Tahe ihewo ludu iseriõre wytese-wana roire. Tii rurure iriõreõlemy. <sup>22</sup> Ihewoludutyhy tule ibutumy roire wytese-wana, tahe ituerenyre iriõreõlemy. Iròòbymy tahe hãwyy tule rurure. <sup>23</sup> Ixixanau tahe mohãbubo tuu rarekre. Ibutumy dori wytese-wana roire. <sup>24</sup> Tai tahe Jesuisi tamyreny rarybere: —Kaki kaiboho teòsamy toite aõma ritina teeryõtenyteki. Tule Deuxururu teeryõtenyte. <sup>25</sup> Ixixanau heka moõ roiõtyhy. Ibutumy iny ÿju wese rarekre biu bedede-txi. <sup>26</sup> Kaiboho aõbo tatyryritinytenyõta iny rubu-ribi kedexixakremy. Kia heka raritinymy rÿire Moisesi tyyriti-ki, òwòrusõmo ijyy-ki rÿimyhÿ. Iwese Deuxu rarybere Moisesi-ò: —Jiarÿ heka Abraõ Deuxu rare. Ijai Deuxu rare. Ijaò Deuxu jiarÿ rare. <sup>27</sup> Jiarÿ heka rubu mahãdu Deuxu aõkõ rare, tahe iru mahãdu Deuxu jiarÿ rare. Kaiboho teòsamy toite.

<sup>28</sup> Bede ywina erydÿÿ mahãduõ nade ijohonamy. Tahe tiiboho widee raryberenymy roholareu, Jesuisi tamyreny rirawyònywihikÿreu,

tahe tii Jesuisi-ò ritÿÿraxinyre: —Tibo rybe bede ywina juhuure. <sup>29</sup> Jesuisi rirawyònyre: —Ka heka juhu ludu rare: —Boholake Israeli mahãdu, judeu ijoi mahãdu wahe. Wanyrÿ, iny Deuxu sohojile rare. <sup>30</sup> Kia aDeuxu luuke ibutumy awo-ribi, aumytytyby-ribi, ibutumy aruru-ribi. <sup>31</sup> Ka heka ihewo ludu rare: —Kai abireluduluuke iwese ixiluuke wese. Ijõ bede ywina heka ka ratyreõre. <sup>32</sup> Tahe Bede ywina erydÿÿ mahãduõ rarybere: —Inatyhymy kai tarybeta. Deuxu heka sohojile ratximyhÿre. <sup>33</sup> Ibutumy awo-ribi iluukemy. Ibutumy aruru-wana iluukemy. Tule ibutumy aeryna-wana iluukemy. Iwese kai ixiluure wese, abire ludu mahãdu luukemy. Kia heka ibutumy iròduxiwelloo ratyre rare. Ibutumy wahidÿÿnaloodÿÿna ratyre rare. <sup>34</sup> Jesuisi rieryre kia hãbu rirawyònywihikÿre tai tamy rarybere: —Kai heka Deuxu Iòlòna-ribi irehemy aõkõ. Tai tahe ibutumy ilau ruberure tÿÿraxidÿÿki.

<sup>35</sup> Jesuisi dohodÿÿna heto-ki rierynanymyhÿreu, rarybere: —Timybo Bede ywina erydÿÿ mahãdu rarybemyhÿre Kristu Davi riòre raremy. <sup>36</sup> Davi rarybere aõmybo Deuxu Tyytybytyhy tamy narybedemy: —Wanyrÿ rarybere Wanyrÿ-ò: —Bodony warurunawe-ribi. Txiòhe rare, aõludu awarawo-txi aritidikre. <sup>37</sup> Tahe Davile Wanyrÿ rininire. Timybo tahe Davi iriòremykre. Tahe iny sõwemy deysana-di roholarenyre.

<sup>38</sup> Tii rierynamyhÿreu, rarybera: —Bexiemyhÿbeny bede ywina erydÿÿ mahãdu lau. Tiiboho heka tyyrehe-di riraluurenyre. Tiiboho heka rybedÿÿlluurenyre hãwãhãkÿ riranaki. <sup>39</sup> Dohodÿÿna heto-ki juhurnana luurenyre. Tule

ta anarỹỹ rỹiwana, juhu ryanadile tamyreny awire. <sup>40</sup> Tiiboho tule wytese urimynydu aõna aõna ritarenyre. Ixitõedỹỹna rehehekỹ rexitõenymyhỹrenyre. Tiiboho heka aõnihikỹmy aõhõkỹmy dỹỹnana riòwynyrenykre.

<sup>41</sup> Jesuisi retehemy rỹimyhỹ dohodỹỹna heto nieruhyna ratya-txi. Tii retehere timybo iny sõwemy tanieru-di tamy rehumyhỹ. Tahe ityhynihikỹ tamy sõwemy nieru-di rehure. <sup>42</sup> Tahe nade wytese iaõkõdu mahãduõ tii rare. Tii inatxi nieru sõmo-di rehure. Tanieru tahe nierukonana rare. <sup>43</sup> Jesuisi ryryre taerydỹỹna-ò: —Inatyhymy adee araybekre. Kowa heka wytese nieru-di rehure ibutumy iny wixira ratyre. <sup>44</sup> Kaa mahãdu ibutumy nieru-di rehure rauhenyredile. Tahe wytese idi rehure ibutumy tanieru-di rexihumy taumy-ribi idi rehure.

## 13

<sup>1</sup> Dohodỹỹna heto-ribi ròhònyreu, ierydỹỹna tamy rarybere: —Erydỹỹdu, beteheke inihe mana nihikỹ-ò, hetohokỹ-ò. <sup>2</sup> Jesuisi rirawyònyre rarybere: —Kaiboho betehebennykre heto nihikỹ-ò. Kia heka mana ijõ wityre-ki rỹiõtyhy, ibutumy heka kedejuxunykre.

<sup>3</sup> Oliveira bederatòhòkỹ-ki tii ronyreu dohodỹỹna hetoko-txi, tahe Pedro, Txiau, Joaõ, ibutumy tamy doide rỹỹraximy iny-ribi irehemy.

<sup>4</sup> Wakoreny bedelyyke, tiubo kia kỹnyikre. Ibutumy aõna aõna kỹnyikre wana tibo iny bedeerynyrenykre. <sup>5</sup> Jesuisi rexiranyre tamyreny rarybere: —Kaiboho anaitxenanydenyheny lau bexiebenyke. <sup>6</sup> Sõwemy dori roikre wanimy

rarybemy rarekre: —Jiarỹ dori Kristu rare. Tahe iny sōwemy anaitxenanykre. <sup>7</sup> Kaiboho wounarybe-ò, aōbinarybe-ò, boholakreu, breburenyōmykre. Kia heka kanakremy ratximyhỹre. Urile bededỹnana ikonanamy aōkōhyylemyhỹre. <sup>8</sup> Uritere inylahinareny, ijōlahinareny-wana wii kidiaōbinanykre. Tule iòlòna mahādu ijō iòlòna mahādu-wana wii kidiaōbinanykre. Bede bedesu ijō hāwā-ki kanamytatakre. Tahe aōkōre rama kedeakre. Kia heka juhu aōhōkỹmydỹnana rarekre.

<sup>9</sup> Kai hexiekre anamydenyheny lau. Tiiboho anawahinydenykre aōludu wedu-ò, iòlò-ò. Tiiboho anahatenydenykre dohodỹna hetowo-ki. Kiabohoko-txi wadee kaiboho kedelyykre inatyhymy aōna aōna rỹiremy. <sup>10</sup> Rybewihikỹ juhū ibutumy bede hāwā hāwā-ò kiditỹnydỹnykre. <sup>11</sup> Tiubo aradyrenykeu, urile nohōtiōmy aōbo kaiboho marybebennykre. Kiautyhyle aōmybo rarybekremy bierykre. Kia tahe marybekre. Kai dori aōkō tarybemahāte, Deuxu Tyytybytyhy tahe rarybemyhỹre. <sup>12</sup> Seriore seriorele wii kidirubunykre. Tyby heka tariore kidirubunykre. Uladule tadi, tyby kidirubunykre. <sup>13</sup> Ibutumy heka iny iy kedeakre wani òraru-ki. Kia heka ikonana-ò riijekreu, taumy tarasanakre. <sup>14</sup> Aōna aōna binahakỹ kanakreu, ibutumy rahukemy. Tiiboho kanakeu itxinonana-txi aōkō rarekemy, kaiboho mahenybenykre bederatòhòkỹ-ò, Judeia hāwā hāwā-ki ratxikeki, mahenybenykre. <sup>15</sup> Inyō hetotyre-ki ratxikeki, urile ròteōmy aōna aōna wydysymy. <sup>16</sup> Inyō bedero-ki ratxirekeki, uritere òkeseōmy ty

òrysymy. <sup>17</sup> Kobexe heny hãwyy bòtòmý rỹira, tule hãwyy tariòre ritònymy rỹira.

<sup>18</sup> Bexitòenykre kia kanaheny bededỹỹnana sirau.

<sup>19</sup> Aõhõkỹmydỹỹnana kanakre tiu heka tuuõre. Juhule Deuxu bede riwinyreule wiji tuu yrubule bede roimyhỹre. Tiu heka kiamy bede roiõtýhy aõhõkỹmydỹỹnanamy. <sup>20</sup> Deuxu bede iòhòmý

rirawetyyòròkeki, moheka irumy ròhònýòtyhy.

<sup>21</sup> Inyõ adee rarybekeki: —Kaki heka Kristu ratxireri. Kowa-ki ratxireri. Uritere ityhydỹỹõmy.

<sup>22</sup> Sõwemy Kristu kanakre, urile Kristu inatyhy aõkõ rarekre. Tule Deuxu rybedỹỹdu kanakre.

Kia Deuxu rybedỹỹdu inatyhy aõkõ rarekre.

Tiiboho heka bedeòby riwinykre tule bede eryna.

Deuxu hõrõ riitxenanykemy inatyhymy kõaõboka.

<sup>23</sup> Kaiboho warybe biyrubunykre. Adee ibutumy juhuule reòbitinyre.

<sup>24</sup> Idi webòhòna rỹira txuu, aõhõkỹmydỹỹnana itue-di,

txuu heka rurunykre. Ahãdu tule rurunykre.

<sup>25</sup> Taina heka kedejuxunykre biu-ribi. Biururu raòweòwenykre.

<sup>26</sup> Iny retehekre Deuxu Riòre dehemyynana-di. Biurawetyky-ribi kodobehekre. Kia heka lobixina kanabòtòranykre. <sup>27</sup> Tahe taỹju kiditeònykre

tawedu ijoihõrõ butudỹỹmy.

Kidibutunykre ibutu bede bede konana-ribi, tule ibutu biukonana-ribi.

<sup>28</sup> Tahe figueira òwòru-ribi erydỹỹna bierybenykre. Tahe iruru raixinykreu tahe, txiru ròhònýkreu, tai tahe bierybenykre wyra

iòhòreri. <sup>29</sup> Tule kia aõna aõnamy bobibenykreu,

tii iòhòlereri. Ijòkile wese nyide. <sup>30</sup> Inatyhymy

adee ararybekre, kia wijinabòdu itueõtyhy aõna aõna rýikre hãrele. <sup>31</sup> Biu, bede-wana ituekre, tahe warybe itueõtyhy. <sup>32</sup> Moõ heka rieryõtyhy tiubededýñnanamybo tii kòdòðsekre. Tule ýju biutxile rieryõre. Tule iriðre rieryõre. Tule tyby sohojile rieryre.

<sup>33</sup> Kaiboho bexieke, beteheke. Kai dori teeryõtenyete tiubededýñnanamybo kòdòðsekre. <sup>34</sup> Kedehemynykremy dori iwese hãbu týimy rarewese tii rexitareu, ririre tadeòdu. Tadeòdulemy tule ridyre itxeredu rethemyhýkemy. <sup>35</sup> Tahe betehe inihe teeryõteri dori tiubo kanakre heto wedu, txioromy ada ruwetya aõbo, ada hãnie hãbu ryry-di aõbo, ada txumy aõbo. <sup>36</sup> Betehe inihe iny araraòðlemy tii rehemynyre aki rahakre atýi-ò. <sup>37</sup> Aõna aõnamy jiarý rarybemyhýre, rarybera ibutu-ò: —Bijebeny.

## 14

<sup>1</sup> Kia-ribi inatxi txumy riuhenymy ratxireri anarýñ kodohònykremy. Kia anarýñ wehityhynamy heka iny ratya-di reare. Tule orotxu anarýñ kia ròhònyre. Tule Deuxu aõmysýdýñdu wedu mahãdu tule bede erydýñdu mahãdu Jesuisi rimyky ratxireri idi rirubunykemy. <sup>2</sup> Tiiboho rarybemyhýrenyre: —Kiahe aõkòre anarýñ rýireriu, iny sòwemy inydeereny kana aõbinanyheny.

<sup>3</sup> Jesuisi Betýnia hãwã-ki ratximyhýu, Simaõ tyybina heto-ki ratximyhýre. Jesuisi òwòru besedýñbire-ki roimyhý. Tahe hãwyy aderòna òwynihiký-di lýnyrena wihiký-di nade. Tai ihyna

riwebòhònrya tahe Jesuisi ratityre-ò ritxiwira. <sup>4</sup> Inyõreny rexyikaranye. Tahe widee rarybera: —Aõherekibo aderòna rahura. <sup>5</sup> Inywitzira tahe iòwynykewi sòwemy nierumy kia-ò. Kia nieru-di tahe iny aõkõdu-ò rawahidỹnykre. Tahe tiiboho rexibynyreri hãwyy dee. <sup>6</sup> Tahe Jesuisi rarybere: —Txìòhe rare, uritere ixibydyỹõmyke. Tii heka aõwihikỹbo wadee riwinyra. <sup>7</sup> Kiamy aõu aõu iny aõkõdu rỹikremy. Aõule heka tamy aõwihikỹ biwinybenyke. Jiarỹ tahe, aki aõu aõu aõkõlekre. <sup>8</sup> Tii heka rexikonananymy ròwidỹỹre. Aderòna-di watyre ritxiwire wabede-ò jiarỹ raõule. <sup>9</sup> Inatyhymy adeereny ararybekre. Aõtxile Deuxu Rybewihikỹ iny relyykre. Kia-ò kahãwyy ijyymy relyykre, ibutumy iny idi ròhõtynykremy aõbo riwinyredi.

<sup>10</sup> Tahe Judasi Isariò Deuxu aõmysỹdyỹdu-ò rara Jesuisi tamy rawahidỹỹkemy. <sup>11</sup> Tiiboho tamy roholarenyre, reysare. Tahe tamy nieru riwahinykemy riurenanyre. Tahe Judasi riijemyhỹre aõu aõu bedewihikỹ tamyreny riwahidỹỹnykemy.

<sup>12</sup> Juhu orotxu anarỹtxure budoeni xiweloo rirubuny rahudi tahe Jesuisi erydyỹna mahãdu tamy rarybere: —Titxibo anarỹ rỹsỹnamy biroxikemy atxiteri. Jiarỹboho kowa-ò aroikre. <sup>13</sup> Tahe Jesuisi tamy rarybere: —Kaiboho boikre hãwãhãkỹ-ò. Tahe hãbu-wana wii biòbynykre butxi-di riwyreriò. Tahe tii biheludunybeny. <sup>14</sup> Aõtxile hetoõ-txi ralòke, kaiboho marybebennyke hetowedu-ò: —Waerydyỹdu rarybera: —Titxiwexe anarỹ

rỹsỹna arirỹsỹkre waerydỹỹna-wana. <sup>15</sup> Tii heka adee kiditeòsinykre hetowowitxiraõ biu-txi. Ibutumy rexihumy rỹire inydeereny. Kowa rỹsỹna inydeereny biywinykre. <sup>16</sup> Tahe ierydỹỹna rexitare. Roire hãwãhãkỹ-ò. Tahe ròhònyre iwese Jesuisi relyyre wese. Tahe ibutumy rexihurenyre anarỹỹ-ò.

<sup>17</sup> Txiorou Jesuisi nade taerydỹỹna waòinatxi reurò-wana. <sup>18</sup> Tiiboho òworubesedỹỹ riroximahãu, Jesuisi rarybere: —Kaiboho wawana teroxitenyteri sohojiõ biwawahinykre. <sup>19</sup> Tahe urihimyò rexiranyre rabadewomy. Tahe widee raryberenyre: —Jiarỹle heka ariwahinykre. <sup>20</sup> Tii rirawyònyre: —Kaiboho, waòinatxi reurò mahãdu sohojiõ. Kia mahãduò orotxu-di wawana rebenymyhỹ besero-ki. <sup>21</sup> Inatyhymy Deuxu Riòre Hãbutyhyhykỹ rakre iwese iritina rỹirewesele. Kobexeheny kowa hãbu heka kidiwahinykre. Tamy iny awire kedeaõlede.

<sup>22</sup> Tiiboho riroxireriu, Jesuisi orotxu rimyreu, raorore, rexitònyre, tahe tamyreny riwahinyre. Rarybere: —Ãhãxe, kia heka waumy wese rare. <sup>23</sup> Tahe vỹhynamona rimyre, rexitònyre, tahe tamyreny riwahinyre. Ibutumy ibute bute iribi tuu riònyre. <sup>24</sup> Tamyreny rarybere: —Kia wãhãlubu wese rare. Kia hãlubu heka rybe tỹmyra ywidỹỹna hãlubu rare. Kia inyboho kidi-nohõtijuadenykre. Wahãlubu heka kedejuxunykre iny rabòrònihikỹ dee. <sup>25</sup> Inatyhymy ararybekre: —Ariõõtyhy heka òtetibederatyruibe tỹmyra ihyy tahe tiutxumybo Deuxu Iòlòna-ki ariõkre.

<sup>26</sup> Deuxuwimy rawinyrenyreu, tahe



rexitarenyre Oliveira bederatòòhòkỹ-ò.

<sup>27</sup> Jesuisi tamyreny rarybere: —Kaiboho ibutumy wijirumy biwaribenykre. Kia heka iritina rỹire.

Itxeredu tahe riròrenykeki, budoeni rahenykre.

<sup>28</sup> Tahe rubu-ribi adexixakreu, arakre akomy Kalileia-ò. <sup>29</sup> Pedro rarybera Jesuisi-ò: —Ibutumy ararikeki, arariõtyhy. <sup>30</sup> Jesuisi tamy rarybera: —Inatyhymy ararybekre.

Wijirumy hãniehãbu inatxi kydrykreule, kai iny wixira-ò biwatxiõnykre inataõ bedemy.

<sup>31</sup> Tahe Pedro rarybera tarurutyhymy: —Aõkõre, aratxiõnyõtyhy, ihãrele tahe awanale arurukre. Ijõ mahãdu tule kia wese rarybera.

<sup>32</sup> Tahe roire Kesemani hãwãmy ninadu-ò. Taerydỹyna-ò rarybera: —Biwaraõmy bonykre kakile. Kowa-ò arexitòenykre. <sup>33</sup> Tii ridyrenyre Pedro, Txiau, Joaõ-wana. Jesuisi rexiranyre rabadewomy ihyy rexitòenyre. <sup>34</sup> Tahe tamy rarybera: —Watyytyby heka rabadewomy ratxireri rubuhyy-ò. Kaki bonykre biijemy.

<sup>35</sup> Tahe iko-txi urihimyò rareu, resere. Rexitòenyre: —Waha, adee arexitòenykre. Adee awikeki, kia òraule tiu waròteõna. <sup>36</sup> Tii rarybere: —Waha, adee ibutumy isiraõre. Kia bemona inyhe waròbi bitake inihe. Tahe wadeewi wadeewi-ki aõkõ watxireri, tahe adeewi-ki.

<sup>37</sup> Tii rehemynyre tai rahare rõrõrenymy roireriò. Rarybere Pedro-ò: —Simaõ, Tarõteri aõbo. Biijeõtyhy sohoji òramy bededỹynana.

<sup>38</sup> Biijebenykre, bexitòenykre, uritere rutaanamy ròteõmykre inatyhymy atyytyby irurudire tahe

ade iruruõre. <sup>39</sup> Tahe Jesuisi ixityre rare rexitòenyre ixiwesele. <sup>40</sup> Ròòsereu, ijõ-ki rahare rõrõmy ixiwesele, irurureny rautxienymyhõ dori. Tiiboho rierykõre idi rirawyònyrenyre. <sup>41</sup> Tahe ixybyle ròòsere tahe rarybere: — Morõbeny bexielehynybeny. Òra iòhòreri. Kia heka Deuxu Riòre Hãbutyhyhykõ kanawahidõõkre òrarudu mahãdu-ò. <sup>42</sup> Bitõmynybenyke, rokoireny, walòsedõõdu iòhòmy rareri.

<sup>43</sup> Tii rarybereri, aõwesele Judasi nade. Kia heka waòinatxi reurò mahãduõ rare. Tii-wana doide hãbu mahãdu mayrehe-di, òhòtemy debòna. Kia heka hãbu mahãdu doide matuari mahãdu-ribi, Bede ywina erydõõ mahãdu-ribi, Deuxu aõmysõdõõdu wedu-ribi. <sup>44</sup> Lòsedu tamyreny juhuu bede eryna riwahinyre. Kawese heka rarybere: — Kowa heka inyõ-ò aruwokre, tii heka hãbu rare. Bimybenykre, birarenybenywhikõkre. <sup>45</sup> Judasi rehemynyrenyre, tahe rarybere: —Wedu, wedu. Tahe tamy ruwore. <sup>46</sup> Juda ijoi Jesuisi rimyra. <sup>47</sup> Kia ijoiõ mayrehe ritare tahe Deuxu aõmysõdõõdu wedu deòdu nohõti riorore. <sup>48</sup> Tahe Jesuisi ðirawyònyde: —Kaiboho mayrehe-di tiwaòrynyteri wasidu-wesemy aõmy, òhòte-di. <sup>49</sup> Jiarõ tahe dohodõõna heto-ki watximyhõ txuõ txuõlemy adeereny araerynanywãhãdenyde. Kowa-ki heka tiwamyõlemyhõtenyde. Tahe aõbo iritina-ki rõireri, kia heka kõnyikremy. <sup>50</sup> Ibutumy ierydõõna mahãdu ririrenyre, rihenyrenyre.

<sup>51</sup> Kia heka hãbuõ riheludunymyhõ tyy tayredile rexitynymy tiiboho ridyrenyre. <sup>52</sup> Tii tahe tyy

ririre tahe rahenyre tadelemy.

<sup>53</sup> Deuxu aõmysÿdÿÿdu wedu-ò tiiboho Jesuisi ridyre. Bede ywina erydÿÿ mahãdu, matuari mahãdu-wana ributunyre. <sup>54</sup> Pedro riheludunyre irehetyhytyhymy. Rehemynyre Deuxu aõmysÿdÿÿdu wedu heto-ò. Tai tahe ixitòteenymy heòtywera-ò rorukumyhÿ heto itxeredu mahãdu-wana. <sup>55</sup> Deuxu aõmysÿdÿÿdu mahãdu wedu, tule dohodÿÿdu mahãdu alobixidu riijemyhÿre aõlemy Jesuisi òludu relyymyhÿre, Kia òraru-ki rirubunyre nykemy. Rahaõre. <sup>56</sup> Sõwemy iny ruimy relyymy rÿimyhÿ. Iruinareny wiribi hitxi hitxilera. <sup>57</sup> Ijõ mahãdu rÿimyhÿre relyyrehãre ruimy rarybere: <sup>58</sup> —Inyboho irybe-ò roholarenymy: Jiarÿ heka dohodÿÿna heto ariixãwididÿÿnykre kia heka hãbu iwidÿÿna rare. Txu inataõ-di ijõ ariwinykre iwidÿÿnaweseõre. <sup>59</sup> Kia heka aõmybo tuu relyyrenyremy irybe wiribi hitxi hitxire. <sup>60</sup> Deuxu aõmysÿdÿÿdu mahãdu rÿire inysõwetya-txi. Tii Jesuisi ritÿÿraxinyre: —Kai aõbo biwarawyònykre aõmybo relyyrenyneri adee òludumy. <sup>61</sup> Tii rerawyònyòlere ixyby tahe Deuxu aõmysÿdÿÿdu mahãdu ritÿÿraxinyre: —Kai aõbo Kristu tate, Deuxu wityhy riòre. <sup>62</sup> Jesuisi rarybera: —Jiarÿ heka. Kaiboho betehebenykre

Deuxu Riòre Hãbutyhyhykÿ Deuxu rurunaweribi-ò ronyneri. Kaiboho tii betehebenykre Deuxu Riòre Hãbutyhyhykÿ biuwetyky-ribi naderi.

<sup>63</sup> Deuxu aõmysÿdÿÿdu wedu ityy riykara idi rarybera: —Aõherekibo ijõ alobixidumy iny rurureneryeri. <sup>64</sup> Kaiboho taholatenyta

aõbina binalemy rarybereriò aõmybohe kaiboho tahõtinyinmyhÿtenyte. Ibutumy heka tawo riraòhòrerenyra rubudukremy. <sup>65</sup> Tahe ijõ ityre rybeximy rarutaara rexiruehetynyre tahe tule rihetenyre. Tahe rarybere: —Mota làhà arahãtenyra. Idi tahe heto itxeredu tule rihetenyre.

<sup>66</sup> Pedro heka ratximyhÿ bedeube-ki tahe ijadõma dehemynde, Deuxu aõmysÿdÿÿdu deòdu. <sup>67</sup> Pedro rexitòteenymyhÿ heòtywera-ò tahe ijadõma tamy retehere. Tahe rarybera: — Kai tule Jesuisi Nazare ludu-wana atximahãte. <sup>68</sup> Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi ròhònyre. <sup>69</sup> Ijadõma ixyby ixyby itxeremy rarybere kowa ijoi-ò: —Kowa heka tii mahãduõ rare. <sup>70</sup> Tahe tii ixityre rexitxiõnyre. Ixybyle kowa ijoiõ Pedro-ò rarybera: —Inatyhymy kai ijõ mahãduõle tate. Kai dori Kalileia mahãdu tate. <sup>71</sup> Tii inatyhytyhyrybemy rarybera: —Jiarÿ reerykõre hãbumy tarybetenyteri. <sup>72</sup> Tahe hãnie hãbu ryryra, inatxi hewoludumy. Ta Jesuisi rybe-txi Pedro tõhõti reare. Iwese Jesuisi rarybere: — Inatxi hãnie ryrykredi, ihewoludukomy ryrykre, wadee bedexitxiõnykre inataõmy. Pedro tahe iribi rexitareu, rahinyre.

## 15

<sup>1</sup> Txuu reareu, Deuxu aõmysÿdÿÿdu wedu, matuari mahãdu, Bede ywina erydÿÿ mahãdu ibutumy ributumy. Tahe Jesuisi ritaataare tahe ridyrenyre Pilato-ò. <sup>2</sup> Pilato Jesuisi-ò ritÿÿraxinyre: —Kai aõbo judeu iòlò tate. Tii rirawyònyre: —Kai

ka tuu tarybeta. <sup>3</sup> Deuxu aõmys̃d̃ỹdu mahãdu wedu rarybere Jesuisi aõna aõna awimy aõkõ riwinyre. Tahe Jesuisi riwawyõnyõhyylere. <sup>4</sup> Pilato ixybyle r̃ỹraxire: —Kai birawyõnyõtyhy aõbo. Kai aõbo taholaleteri aõmybo tiiboho autedé-ò raryberenyteri. <sup>5</sup> Tahe Jesuisi rarybeõhyylere tahe Pilato urile bede riòtiinymyh̃re.

<sup>6</sup> Kia heka juhUU iny deòwarixina rare hãbu ròteduõ ritakemy anar̃ỹtxuu. Aõtxile iny tamy rexitõdenyke. <sup>7</sup> Ròtenawo-ki raremyh̃ inyõ Barabamy ninadu-ki. Tii tahe inywitxira aõbinadu mahãdu-wana ratximyh̃. Kiamy inydinodu òraru-ki aõbina r̃ỹireki, tii iny rirubunyre. <sup>8</sup> Iny s̃õwehek̃y-ki doide, tahe rexiranyre ixitõed̃ỹmy: iny deòwarixina kòdòhònykre. <sup>9</sup> Pilato dirawyõnyde: —Adeereny ariòlòd̃ỹnykekõ aõbo ka judeu iòlò. <sup>10</sup> Tii rieryre dori Deuxu aõmys̃d̃ỹdu mahãdu wedu tamy Jesuisi ridyrenyre iwobinanareny lau. <sup>11</sup> Deuxu aõmys̃d̃ỹdu wedu inysõwe riixitõed̃ỹnyre Baraba riòlòd̃ỹnykemy. <sup>12</sup> Pilato rit̃ỹraxinyre ixybyle: —Aõhebo tahe idi arot̃ỹnykre. Kaiboho tuu teninimyh̃tenyte judeu iòlòmy. <sup>13</sup> Tiiboho rirajuarenyre: —Bitamad̃ỹnyke itxeò nihik̃y-ò. <sup>14</sup> Ta Pilato tamyrenyre rit̃ỹraxinyre: —Aõbina taka riwinyre. Aõhe-wana ixityre rirajuamyh̃renyre: —Bitamad̃ỹnyke itxeònihik̃y-ò. <sup>15</sup> Pilato inydee aõ riwahinykemy r̃õhõtynra, tai ta Baraba riòlòd̃ỹnyre. Idi tahe Jesuisi riyhytanymy rahudi, riteònyre itxeònihik̃y-ò riukòrenykemy.

<sup>16</sup> Soldado ridyrenyre heto woube-ò. Tai tahe ibutumy soldado ributumyre. <sup>17</sup> Tahe

tyysòborehekỹ-di rityynyrenyre. Tahe ede rataana ritidire ira-ò. <sup>18</sup> Tahe rirybenyrenyre: —Adee nihikỹre judeu iòlò. <sup>19</sup> Tahe rihetenyre bòtòre-di irati-ò, tahe ityre rarybexinyre tahe rỹire tatiowotimy rityhynykemy. <sup>20</sup> Tahe tyysòbore iribi ritara, tahe ityyle tamy ritidira. Inatyhymy ridyrenyre itxeònihikỹ-ò riukòrenykremy.

<sup>21</sup> Kowa-di rekoarenyre hãbuõ. Simaõ Sireni inire. Kia heka Alexỹdre, Rufu-wana tyby rare. Tii nade bedero-ribi. Tiiboho tahe riitxyydỹnyre itxeò-di retyykemy.

<sup>22</sup> Riwyrenyre bederahy-ò Kòkòta ninadu-ò. Kia heka iwitxira rybe rare. Kia heka rubu ratitybyho wese rare. <sup>23</sup> Tiiboho vỹ riurinyre òwòruburu-wana. Tahe tii tuu riõõlera. <sup>24</sup> Itxeònihikỹ-ò raukòrenymy rahudi tahe ityy wirarea riatyre, tahe ityy-di rarudeòsanyre tibo iny sohoji sohoji ityy riwykremy. <sup>25</sup> Biurasò txu Jesuisi itxeò-ki raukore. <sup>26</sup> Iratya-ki tahe ritina rỹire: JUDEU IÒLÒ. Kia heka iny tuu rarybemyhỹrenyre. <sup>27</sup> Tahe tii-wana inatxi wasidu itxeònihikỹ-ò riherinanyre, ijõ ruruweribi-ò, ijõ hyweweribi-ò. <sup>28</sup> Tahe rotỹnyre aõbo Deuxu ritina-ki rỹire wese: Tii ratximyhỹ òrarudu mahãdu-wana. <sup>29</sup> Iny reareare tara riohowimy rarybere aõbina binamy: —Kobe, kai korihe dohodỹna heto biatykemy inataõ txudile tahe ixityre bidiwinykre. <sup>30</sup> Kaile inyhe bexitakre itxeò-ribi. <sup>31</sup> Iwesehyyle Deuxu aõmysỹdỹdu wedu, bede ywina erydỹ mahãdu-wana widee raryberenyre. Jesuisinimy raujõmorenyreri: —Tii iny witxira ritare, tiile tahe rexitaõtyhy. <sup>32</sup> Kristu,

judeu Iòlò, bodobeheke itxeò-ribi jiarỹboho arobirenykremy, tai tahe aratyhynyrenykykremy. Tule wasidu tii-wana raukòrenyre itxeò-ki Jesusimy raujõmorenyre.

<sup>33</sup> Txutyeyu ibutumy bede rurunyre. Tahe roire txu kaò resemy. <sup>34</sup> Kiaule tahe Jesuisi rarybeterenyre: —Elòi, Elòi, lema sabatani. Kia heka iwitxira tybe rare. Kia rare: —WaDeuxu waDeuxu, aõherekibo kai tiwarite. <sup>35</sup> Ijoiõ heka tamy roholareu, rarybere: —Tii heka Eliasi-ò ryrereri. <sup>36</sup> Hãbuõ reare bexi ritỹxinyre vỹ juberere-di idi tahe ritidire tabòtòrejura-ò. Riwahinyre Jesuisi ritòkemy. Tahe rarybere: —Deinyhe tamy inyhe reketehereny Eliasi kanakremy aõbo inyhe itarasamy. <sup>37</sup> Jesuisi ryrere irariemy idi rurure. <sup>38</sup> Dohodỹyna hetowetyy raykare inatxi weryna tyymy, biu-ribi, bede-ò. <sup>39</sup> Soldado dinodu Jesusiko-txi ratximyhỹre. Tahe rurureu, irubumy robire. Tahe rarybere: —Ka heka inatyhymy Deuxu riòre rare. <sup>40</sup> Tule hãwyy mahãduõ retehemy rỹimyhỹ irehe-ribi, tòwysyreny-ki, Marie Madalena, Marie (Txiause, Jyjese tii rare. Txiau heka Jyje hewoludumy rare.) Salome tule ihỹre ijõ-wana. <sup>41</sup> Kia heka Jesuisi Kalileia raremyhỹu, tiiboho tahe sõwemy iny-wana doide Jerusalẽ-ò.

<sup>42</sup> Txioromyhe dehemynde. Wirareasanatxu rare. Kia heka sabadotxukokile rare. <sup>43</sup> Jyje Arimatea hãwã ludu dohodỹydu nihikỹõ rare. Tule heka tii riraòmy ratximyhỹ Deuxu Iòlòna. Tii ruberuõlemy rare Pilato-ò Jesusiumymy ix-itòedỹmy. <sup>44</sup> Pilato rabedeòtiidỹynanyre Jesu-

isi rurumy roimyh̄di tai ryryre soldado din-  
 odu-ò. Tai Pilato ritỹ̄raxinyre, Jesuisi rurumy  
 roimyh̄di. <sup>45</sup> Soldado rarybereu Jesuisi rurumy  
 roiremy tahe Pilato riteònyre Jesuisiumy Jyje-ò  
 iwahidỹ̄my, <sup>46</sup> Jyje ritare itxeònihikỹ-ribi tahe  
 ritỹ̄tenyry tyyurahãkỹ-di. Idi tahe ritidirenyre  
 mana hãloo wabedewo-ò. Tahe mananihikỹ-di  
 riijòtòbònyra. <sup>47</sup> Marie Madalena, ijõ Marie Jyjese  
 reteherenyre titxibo tii ritidirenyreò.

## 16

<sup>1</sup> Tahe nobiutxu, Marie Madalena, ijõ  
 Marie-wana ihewoludu Marie, Txiause,  
 Salomese-wana rare. Tiiboho lỹnyrena  
 riõbranyrenyry. Tahe roire Jesuisibymy idi  
 rekoakremy lỹnyrena-di. <sup>2</sup> Juhutxu semana  
 bededỹ̄nanau txuu deadeule roire wabede-ò.  
<sup>3</sup> Widee raryberenyre: —Mowexe mana ritakre  
 ijò-ribi. <sup>4</sup> Tahe tuu robirenyre. Mana nihikỹ  
 ritamy rỹire. <sup>5</sup> Wabede-ò rirònyrenyry, robirenyre  
 weryrybòweselemy rononymh̄y ruruweribi-ò.  
 Ityy urahakỹmy rononymh̄y. Tahe tiiboho bede  
 riòtiinyrenyry ruberurenymy. <sup>6</sup> Tii tamyreny  
 rarybera: —Uritere breburenyõmy. Kaiboho  
 aõbo teòrytenyryta Jesuisi Nazare ludu. Kia itxeò-ki  
 rurure. Tii aõkõ kaki ratxireri. Rexixara  
 rubu-ribi. Betehebeny inihe tai ritidiraò.  
<sup>7</sup> Makre. Marybekre ierydỹ̄na-ò tule Pedro-ò.  
 Tii rakre akorenymy Kalileia-ò kaiboho tuu  
 lobiximy boikre tuu adeereny raryberemy.  
<sup>8</sup> Tahe tiiboho rihenyrenyry wylemy wabede-ribi  
 ruberumy. Tiiboho moõ heka rarybeõhylyrenyry  
 ruberumyh̄renyki.



<sup>9</sup> Juhutxu semana bededỹ̃nau Jesuisi rubu-ribi rexixare. Idi tahe juhuu àsitereribile rexitỹ̃nnyre Marie Madalena dee. Kia-ribi heka juhuule ritare debò inatxi reurò tyytybybinamy. <sup>10</sup> Tii rare Jesuisi-wana raremyhỹ mahãdu-ò. Tiiboho rabadewomy ratximyhỹreny, rahinymyhỹreny. <sup>11</sup> Tamyreny relyyreu iwese Jesuisi tamy rexitỹ̃nnyre wese Jesuisi irulemy ratximyhỹmy tuu robireke, rityhynyõlerenyre.

<sup>12</sup> Jesuisi rexixamy rahudi tahe, iwitxiramy rexisỹ̃nny inatxi erydỹ̃na-ò. Tiiboho heka roimyhỹrenyre bedero-ò. <sup>13</sup> Tahe dòòsede relyyrenyre taijoi-ò, tahe tule rityhynyõlerenyre.

<sup>14</sup> Tahe waòsohoji reurò erydỹ̃na-ò Jesuisi àsitereribile rexitỹ̃nnyre. Tiiboho riroximyhỹrenyò rexitỹ̃nnyre. Tahe Jesuisi tamyreny rarybera: —Aõherekibo kaiboho iny wamy robira mahãdu tetyhynyõteri. <sup>15</sup> Kaiboho boibenyke ibutumy bede bede-ò Rybewihikỹ bitỹ̃nnykremy. <sup>16</sup> Inyõ Rybewihikỹ rityhynykeki, idi kidisebenykeki, tii Deuxu ritake. Inyõ rityhynyõkeki, Deuxu ixi-ribi riteònykre iòraru-ki. <sup>17</sup> Kia bede eryna ityhydỹ̃du kidiheludunykre. Tiiboho tyytybybina kiditeònykre wani-ki. Tule heka tiiboho itỹmyra rybe kanarybedenykre. <sup>18</sup> Hemyllala rimyrenyreu, aõhe rotỹ̃nyõlere tule rubuna monamy riõkeki, rotỹ̃nyõlere. Tiiboho tebò ritidirenykre bina mahãdu-ò tahe riteytenykre.

<sup>19</sup> Idi tahe Jesuisi tarybe rahuredi, Deuxu ridyre biu-ò. Tahe ronyre Deuxu ruruweribi-ò. <sup>20</sup> Tahe tiiboho roire ibutumy bede bedemy tai bede ritỹ̃nnyrenyre. Wanyrỹ̃ riwiòhenanyrenyre

tahe bede erna-di irybe ixidee rirnyrenyre  
ihelududỹdu mahãdu-ò.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 11 Nov 2022 from source files  
dated 29 Jan 2022

55ce0bcd-101e-52a3-984e-847027efe150